

清

史

稿

清史稿

列傳九十七

齊蘇勒

嵇曾筠

子璜

高斌

侯子高晉

完顏偉

顧琮

白鍾山

齊蘇勒字篤之納喇氏滿洲正白旗人自官學選天文生爲欽天監博士遷靈臺郎擢內務府主事授永定河分司康熙四十二年聖祖南巡閱河齊蘇勒扈蹕至淮安上諭黃河險要處應下挑水埽壩命往煙敦九里岡龍窩修築齊蘇勒於回鑾前畢工上嘉之洊擢翰林院侍講國子監祭酒仍領永定河分司事河決武陟奉命同副都御史牛鈕監修隄工疏言自沁河隄頭至榮澤大隄十八里擇平衍處築遙隄使河水趨一道專力刷深不致旁溢六十一年世宗卽位擢山東按察使兼理運河事命先往河南籌辦黃河隄工時河南巡撫楊宗義請於馬營口南舊有河形處濬引河齊蘇勒同河道總督陳鵬年疏言河不兩行此洩則彼淤馬營口隄甫成若開引河慮旁洩侵隄事乃寢雍正元年授

河道總督既上官疏言治河之道若瀕危而後圖之則一丈之險頓成百丈千金之費糜至萬金惟先時豫防庶力省而功易就又言各隄壩歲久多傾圯弊在河員廢弛冒銷帑金宜嚴立定章示懲勸並允行乃周歷黃河運河凡隄形高卑濶狹水勢淺深緩急皆計里測量總河私費舊取給屬官歲一萬三千餘金及年節餽遣行部供張齊蘇勅裁革殆盡舉劾必當其能否人皆懷懷奉法陽武祥符商邱三縣界黃河北岸有支流三逼隄繞行五十餘里南岸青佛寺有支流一逼隄繞行四十餘里齊蘇勅慮刷損大隄令築壩堵禦并接築子隄九千二百八十八丈隔隄七百八十丈又以洪澤湖水弱慮黃水倒灌奏築清口兩岸大壩中留水門束高清水以抵黃流及淮水暢下壩在波濤中又慮壩爲水蝕遣員弁駐工湖漲下掃防壩黃漲則用混江龍鐵篦子諸器駕小舟往來疏濬不使沙停水患始緩詔豫籌山東諸湖蓄洩以利漕運疏言兗州濟寧境內如南旺馬場獨山安山馬場昭陽獨山微山稀山等湖皆運道資以蓄洩昔人謂之水櫃民乘涸占種湖身漸狹宜乘水落除已墾熟田丈量立界禁侵

越謹淳蓄當連河盛漲引水使與湖平卽築堰截堵如遇水淺則引之從高下注諸湖或宜隄或宜樹或宜建閘啓閉令諸州縣量事程功則湖水深廣漕艘無阻矣二年廣西巡撫李紱入對上諭及淮揚連河淤墊年久水高於城危險可慮紱請於連河西別濬新河以其土築西隄而以舊河身作東隄東岸當不至潰決上命與齊蘇勒商度齊蘇勒奏言淮河上接洪澤下通江口西岸臨白馬寶應界首諸湖水勢汪洋無際若別挑新河築西隄於湖水中不惟糜費巨金抑且大工難就上是其言是秋颶風作海潮騰踊丈餘黃河入海之路二水衝激歷三晝夜而濱海隄岸屹然上嘉其修築堅固賜孔雀翎并予拜他喇布勒哈番世職三年副總河嵇曾筠奏於祥符縣回回寨濬引河事將竣齊蘇勒奉命偕總督田文鏡察視齊蘇勒奏言濬引河必上口正對直衝而下口有建頡之勢乃能吸大溜入新河借其水力滌刷寬深今所濬引河與見在水向不甚相對當移上三十餘丈對衝迎溜復於對岸建挑水壩挑溜順行以對引河之口俟水漲時相機開放庶河流東注而南岸隄根可保無虞上命內閣學士

何國宗等以儀器測量命齊蘇勒會勘齊蘇勒奏儀器測度地勢於河工高下之宜甚有準則今洪澤湖淤水壩舊立門檻太高不便於洩水請敕諸臣繞至湖口用儀器測定將門檻改低庶宜防有賴又奏言治河物料用葦柳而柳尤適宜今飭屬於空閒地種柳沮洳地種葦應請凡種柳八千株葦二頃者予紀錄一次著爲例均稱旨尋又奏言供應節禮並已裁革河標四營舊有坐糧歲千餘金以之修造墩臺製換衣甲器械鹽商陋規歲三千金爲出操驗兵賞功犒勞之用每年往來勘估伏秋兩汛出駐工次車馬舟楫日用所需拮据實甚河庫道收額解錢糧向有隨平餘銀五千餘除道署日用工食請恩准支銷上允之四年以堵築睢寧朱家口決口加兵部尙書太子太傅五年疏言黃河斗岸常患衝激應改斜坡俾水隨坡溜坡上懸密柳抵之既久溜入中泓柳枝落泥併成沙灘則易險爲平從其請五年齊蘇勒有疾上遣醫往視尋入覲命歲支養廉萬金六年兩江總督范時繹江蘇巡撫陳時夏濬吳淞江上命齊蘇勒料理築壩陳家渡松江知府周中錄千總陸章乘舟督工下埽潮迴壩陷溺崙

齊蘇勒往視察下爲土壤中有停沙因督令疏濬墻工乃竟復偕曾筠會勘河南雷家寺支河是秋事畢於是黃河自碭山至海口運河自邳州至江口縱橫繇互三千餘里兩岸隄防崇廣若一河工益完整七年春疾甚上復遣醫往視尋卒賜銀三千兩爲歸櫬資進世職三等阿達哈哈番賜祭葬諡勤恪上又以靳輔齊蘇勒實能爲國宣勞有功民社命尹繼善等擇地令有司春秋致祭齊蘇勒久任河督世宗深器之嘗諭曰爾清勤不待言而獨立不倚從未聞貪緣結交尤屬可嘉又曰隆科多年羹堯作威福攬權勢隆科多於朕前謂爾操守難信年羹堯前歲數詆爾不學無術朕以此知爾獨立也又曰齊蘇勒歷練老成清慎勤三字均屬無媿八年京師賢良祠成復命與靳輔同入祀

松曾筠字松友江南長洲人父永仁諸生從福建總督范承謨死事母楊守節撫曾筠成立事分見忠義列女傳中曾筠康熙四十五年進士選庶吉士授編修累遷侍講雍正元年直南書房兼上書房擢左僉都御史署河南巡撫卽充鄉試考官遷兵部侍郎河決中牟劉家莊十里店諸地詔往督築逾數月工竟

二年春奏言黃沁並漲漫溢饒期營秦家廠馬營口諸隄循流審視窮致患之  
由見北岸長沙灘逼水南趨至倉頭口繞展武山根逶迤屈曲而下官莊峪又  
有山嘴外伸河流由西南直注東北秦家廠諸地頂衝受險請於倉頭口對面  
橫灘開引河俾水勢由西北而東南毋令激射東北並培釘船幫大壩更於上  
下增築減水壩秦家廠諸地險勢可減又與河督齊蘇勒會奏培兩岸隄北起  
榮澤至山東曹縣南亦起榮澤至江南錫山都計十二萬三千餘丈皆從之授  
河南副總河駐武陟疏言鄭州大隄石家橋迤東大溜南趨應下埽簽椿復於  
埽灣建礮嘴壩一中牟拉牌寨黃流逼射應下埽護岸建礮嘴挑水壩二穆家  
樓隄工坐衝亦應下埽加鑲陽武北岸祥符珠水牛趙二處工隄近因中牟迤  
下新長淤灘大溜北趨成衝應順埽加鑲又言小丹河自辛句口至河內清化  
鎮水口二千餘里昔人建閘開渠定三日放水濟漕一日塞口灌田日久閘夫  
賈水阻運請嚴飭仍用官三民一之法違治其罪又言祥符南岸回回塞對面  
淤灘直出河心致河勢南趨逼省城請於北岸舊河身濬引河導水直行上諮

蘇勅用曾筠議四年奏衛河水盛請於汲湯陰內黃大名諸縣築草壩二十七  
又請培鄭州薛家集諸處埽壩五年命兼管山東黃河隄工尋轉吏部侍郎仍  
留副總河任六年疏言儀封北岸因水勢衝急雷家寺上首灘崖刷成支河請  
將舊隄加幫接築土壩跨斷支河以防掣流侵隄青龍岡水勢繁紆將上灣洶  
作深兜與下灣相對請乘勢開引河導水東行尋擢兵部尙書調吏部仍管副  
總河事奏請培蘭場耿家寨北隄下埽簽椿築壩七年授河南山東河道總督  
疏請開荊隆口引河八年署江南河道總督疏言山水異漲匯歸駱馬湖溢連  
浮黃河湖合一請於山盱周橋以南開壩洩水並啓高寶諸堰分水入江海高  
堰山盱石工察有椿腐石欽順砌卑矮者應築月壩加高培實其年久傾圯者  
全行改築興工之際築壩攔水留舊石工爲障俟新基築定再除舊石仍留舊  
底二層以禦風浪又奏禹王臺壩工爲江南下游保障洩水源長性猛壩工受  
衝請於見有竹絡壩二十七丈外依頂衝形勢建石工六百餘丈接連岡阜仍  
築土隄並洩流河口門使循故道直趨入海十年奏揚州稻芒河開商工草率



改歸官轄並增設閘官十年加太子太保十一年四月授文華殿大學士兼吏部尚書仍總督江南河道予一品封典十二月丁母憂命在任守制曾筠奏懇回籍終制溫詔許之以高斌暫署仍諭曾筠本籍距淮安不遠明歲工程就近協同經理十二年四月同高斌奏增築海口辛家蕩隄開同副總河白鍾山奏修清江龍王閘濬通鳳陽廠引河十三年諭曾筠葬母事畢赴工高宗御極命總理浙江海塘工程乾隆元年兼浙江巡撫尋命改爲總督兼管鹽政曾筠條奏鹽政請改商捕爲官役嚴緝私販定緝私賞罰地方有搶鹽奸徒官吏用盜案例參處又疏請於海軍築尖山墻建魚鱗石塘七千四百餘丈入覲加太子太傅二年疏請築滔安滔河石礪三年疏請修樂清濱海隄又疏請發省城義倉運溫台諸縣平糶並從之尋召入閣治事以疾請回籍調治上令其子璜歸省又遣醫診視卒贈少保賜祭葬諡文敏祀浙江賢良祠又命視斬輔齊蘇勒例一體祠祀曾筠在官視國事如家事知人善任恭慎廉明治河尤著績用引河殺險法前後省庫帑甚鉅第三子璜亦由治河有功官大學士繼其武璜字

尙佐幼讀禹貢曰禹治水皆自下而上蓋下游宜通水自順流而下長老咸驚  
異雍正七年賜舉人八年成進士選庶吉士年裁二十授編修再遷諭德乾隆  
元年命直南書房三年丁父憂服闋擢庶子兩歲四遷左僉都御史九年奏督  
撫閱兵祇就趨走應對定將弁能否請近省命大臣邊省命將軍副都統簡閱  
行伍是歲令大學士訥親閱河南山東江南三省行伍璜此奏發之也璜侍曾  
筠行河習工事奏河工疏築諸事請浚毛城鋪壩下引河並於順河集諸地開  
河引溜修築黃河岸留新黃河韓家堂諸地舊口洩盛漲議行授大理寺卿累  
遷戶部侍郎十八年十月黃淮並漲璜疏請濬銅山以下清口以上河身並仿  
明劉天和製平底方船用鐵耙疏沙修補高堰石工歸仁隄開酌復江南境內  
減水閘壩尙書舒赫德等被命視河奏請派熟諳工程大員董理堤防因令璜  
偕工部侍郎德爾敏督修璜奏高堰工程有甌石之殊年分有新舊之異今當  
修砌石工隄外築攔水壩並將舊有甌工盡改石工石較甌重椿木應培增舊  
修石隄用石二進石後用甌二進甌與土不相融結久經風浪根空基圯令於

甌石後加築灰土三尺以禦衝刷又奏串場河爲諸水總匯請自石碇閘南更建閘二並就舊河道疏濬直達海口十九年奏高堰高澗龍門古溝四處深塘兜澗請修復草壩皆從之十九年隄工竟議叙轉吏部二十年以母病乞假歸二十二年春上以璜母病愈授河南副總河並諭曰璜侍父曾篤久任河工見聞所及諳練非難母雖年近八十常淮帶水儘可輕舟迎養固無異在家侍奉也四月上南巡臨視高堰清口及徐州諸工以伏汎將至近河諸地歲頻歉貧民甚多諭疏築諸工同時並舉以工代賑因璜前奏請於昭關增滾壩濬支河南關舊壩改建滾水石壩卽命璜董其事璜奏運河東隄減水入下河經劉莊伍祐新興諸場分注門龍新洋二港歸海但劉莊大團閘至新興石碇閘相距較遠請於伍祐沿窪口蔡家港各增建石閘引水出新洋港並疏射陽湖港口使之徑直濬串場河以西孔家溝岡溝河皮家河支流凡三此皆下河歸海之路也湖河諸水歸海紆廻歸江逕直多一分入江卽少一分入海應挑河築壩使湖河水勢相平乃將各壩開放則湖水既減可爲容納來水地伏秋水盛洩

高郵湖引入運河出車邏南關二壩則歸海水少下河田廬可無慮矣上諭曰  
璜此奏分別緩急因勢利導會全局而熟籌之改紆爲直移遠爲近濬淺爲深  
具有條理卽令尹繼善白鍾山等會璜次第興舉十一月高郵運河東壩新建  
石壩工成奏請酌定水則車邏南關二壩過水至三尺五寸開五里中閘至五  
尺開新建石壩又奏車邏南關壩脊高於高郵湖面二尺七寸芒稻閘爲湖水  
歸江第一尾閘請常年啓放俾江湖脈絡貫通上深嘉之從所請並降旨命勒  
石閘畔二十三年正月擢工部尙書五月上旬下江諸工皆竟九月調禮部二十  
四年四月請在籍終養二十五年詣京師祝上壽歸至清江浦奏言歸江之路  
尙有應籌請於金灣壩下開引河並濬董家溝又以廖家溝石羊溝三壩改低  
三尺使與芒稻閘相準上命交尹繼善等勘議二十九年丁母憂三十二年服  
闋署禮部尙書旋實授七月授河東河道總督奏楊橋大壩爲河南第一要工  
雖已堵閉時輒滲漏而北岸河灘順直旣不能挑引河分溜大壩迤東又遍地  
飛沙不能建越隄請將壩身裹戩培厚用資完固璜每巡河不避艱險身先屬

吏一夕聞虞城工險馳往天甫曉雨雹交下下埽岌岌欲崩從者失色勸璜姑退璜立隄上叱曰埽去我與俱去兩雹息隄卒無恙三十三年九月召授工部尙書罷直南書房尋以在河督任未甄別佐雜左遷左副都御史三十六年遷工部侍郎三十八年擢尙書調兵部四十年復調工部四十四年調吏部協辦大學士初璜議挽黃河北流仍歸山東故道入對嘗及之是歲河決青龍岡大學士阿桂視工上以璜議諮阿桂及河督李奉翰僉謂地北高南低水性就下欲導河北注揣時度勢斷不能行上復命廷臣集議仍謂黃河南徙已久不可輕議改道寢其事四十七年加太子太保在上書房總師傅上行走並以璜年老諭冬令日出後入朝賜元狐端罩五十年正月與千叟宴爲漢大臣領班五十一年以老乞休賜詩慰留上幸避暑山莊命留京辦事五十五年四月以璜成進士逾六十年重與恩榮宴璜年八十與高宗同歲生生日在六月奏改萬壽節後上嘉其知禮代定八月十九日賜詩及聯勝上方珍玩寵之五十六年復賜肩輿入直五十九年七月卒年八十有四命皇八子奠醑贈太子太師賜

葬祭諡文恭子八長承謙進士官至侍讀先璜卒族子承恩舉人累官至河東河道總督

高斌字右文高佳氏滿洲鑲黃旗人初隸內務府雍正元年授內務府主事再遷郎中管蘇州織造六年授廣東布政使調浙江江蘇河南諸省九年遷河東副總河十年調兩淮鹽政兼署江南織造十一年署江南河道總督十二年回鹽政任復署河道總督培范公隄六萬四千餘丈十三年回鹽政任旋授江南河道總督乾隆元年疏請河工搶修工段需用土方令河兵挑運十之四用民工十之六又請葺蕩管採柴均歸廠運又請各州縣河工外解各項悉歸河庫道河南永城江南蕭縣頻年被河患上命高斌會兩江總督趙宏恩河南巡撫富德籌疏通之策高斌等奏黃河南岸碭山毛城鋪向有減水石壩一蕭縣王家山有天然減水石閘一睢甯縣峯山有減水閘四建自康熙間誠分黃導淮以水治水之善策年久淤淺水發爲患毛城鋪舊有洪溝巴河二河爲減洩黃水故道閘下地勢東北偏高水向南行漫入祝家口請俟水涸疏濬二河並於

二河上游開蔣清河築祝家口潘家口二壩渟水南流使盡入蔣溝洪溝巴河  
分流下注永城碭山諸縣當無水患王家山天然閘減水會入徐溪口舊有引  
河間有淤淺峯山減水四閘歷年既久引河亦有淤淺均應疏濬又奏准揚運  
河自清口至瓜洲三百餘里其源爲分洪澤湖水入天妃閘建領而下經淮安  
寶應高郵揚州以達於江惟借東西漕隄爲障請於天妃正越兩閘之下相距  
百餘丈各建草壩三壩下建正石閘二越河石閘二又於所建二閘尾各建草  
壩三重重關鎖層層收蓄則水平溜緩可禦洪澤湖異漲亦可減運河水勢湖  
水三分入運七分會黃山盱尾間天然南北二壩非洪澤湖異漲不可輕開使  
清水全力禦黃而高寶諸湖所受之水循軌入口不至泛溢下河則高寶興鹽  
諸縣民田可免洪湖洩水之患疏入均議行御史夏之芳等疏言毛城鋪引河  
一開則高堰危淮揚運道民生可虞命高斌會大學士嵇曾筠副總河劉永澄  
等詳度安徽布政使晏斯盛廣東學政王安國復請濬海口又命高斌與宏恩  
及江蘇巡撫邵基會勘二年三月高斌請入覲趙宏恩內擢戶部尙書亦詣京

師上命王大臣集議並召之芳等皆與高斌言毛城鋪減水壩康熙十七年靳輔所建減水歸洪澤湖助清刷黃六十年來河道民生均受其益見沿毛城鋪乃因壩下舊河量加挑濬使水有所歸並非開壩況減下之水紆回曲折六百餘里經徐蕭睢宿靈虹諸州縣有楊疇等五湖爲之停蓄入湖時卽已澄清無挾沙入湖之患亦無湖不能容之慮之芳等仍執所見議未決御史甄之璜奏毛城鋪開河准揚百萬之衆憂慮惶恐鍾衡條奏亦及之上卒用高斌議斥之璜衡之芳等高斌復請別開新運口堵塞舊運口以避黃河倒灌三年正月淮揚運河工竟有旨嘉獎四年上聞時論議高斌所改新運口離黃稍遠而上游水勢遇黃河異漲仍不見倒灌命大學士鄂爾泰乘驛往勘鄂爾泰仍主開新運口如高斌議八月高斌入覲命便道與直隸總督孫嘉淦總河顧琮會勘直隸河道六年奏言黃河自宿遷下至清河河流湍急內逼運河唇齒相依請培運河南岸縷隄作爲黃河北岸遙隄又言江都瓜河地勢卑下請量改口門別濬越河以減淮水入瓜河分數又言鎮江南岸埽工宜改甌工均下部議行調



直隸總督兼管總河奏言永定河惟在尾閘通暢請於三角淀旁開引河下接  
大清河老河頭上接鄭家樓水口挑去積土卽於北岸圈築坡埝以防北轍南  
岸亦量爲接築以遏南溜下口河唇隨時疏通至上游應籌分洩請於南岸雙  
營北岸胡林店小惠家莊各增建三合土滾壩一並減隄高使卑於壩南岸郭  
家隄舊草壩應一律修築如式七年准揚水災上命高斌及侍郎周學健會總  
督德沛等治賑事畢還直隸復奏言永定河上游爲桑乾河自山西大同至直  
隸西甯兩岸可各開渠灌田自西甯石閘村入山經宣化黑龍灣懷來和合堡  
宛平沿河口兩山夾峙一線中趨若於山口取巨石錯落堆疊仿竹絡繹之意  
爲玲瓏水壩以殺其洶湧則下游河患可減疏上均議行十年三月加太子太  
保五月授吏部尙書仍管直隸水利河道工程十二月命協辦大學士軍機處  
行走十一年御史楊開鼎劾南河河道總督白鍾山河決匿災不報命高斌往  
江南會總督尹繼善按治白鍾山坐奪官疏言准黃二潰每年伏秋水漲以老  
壩口水誌爲準則乾隆七年最大水誌連底水一丈四尺七寸當以此較量每

年水勢各處閘壩開閉應以就近石工水漲尺寸爲度運河水漲又命高斌往勘疏陳培六塘河謝家莊龍溝口諸處隄堰濬中墩河項家衛東門河又疏請豁免海州沐陽贛榆諸縣逋賦及板浦徐濱中正莞濱臨洪興莊諸場折價帶徵銀並從之高斌嘗謂黃水宜合不宜分清水宜蓄不宜洩惟規度湖河水勢視其縮盈以定蓄洩方不至泛溢阻礙爲民害諸所籌畫皆可循守十二年三月授文淵閣大學士四月命往江南同河道總督周學健督理防汛五月直隸水利工竟十三年命偕左都御史劉統勳如山東治賑又命偕總督顧琮如浙江按巡撫常安婪賄狀高斌等頗不欲窮治上又遣大學士訥親往按責高斌模稜下吏議奪官命留任閏七月周學健得罪命兼管江南河道總督尋以籍學健家產徇私瞻顧奪大學士仍留河道總督十六年三月上南巡命仍以大學士銜管河道總督事閏五月暫管兩江總督八月旴南陽武漫工未合龍詔往相度修築命未下高斌奏請馳赴協辦上獎其急公任事得大臣體十一月工竟命同侍郎汪由敦勘天津諸處河工十七年年七十賜詩十八年洪澤湖

溢邵伯運河二閘衝決高郵寶應諸縣被水下部嚴議學習河務布政使富勒赫奏劾南河虧帑命署尙書策楞尙書劉統勳往按策楞等疏發外河同知陳克濟海防同知王德宣虧帑狀並及洪澤湖水溢通判周冕未爲備水至不能禦不卽奏劾狀上責高斌徇縱與協辦河務張師載並奪官留工効力贖罪九月黃河決銅山張家路南注靈虹諸縣歸洪澤湖奪准而下上以秋汛已過何至衝漫河隄責高斌命往銅山勒限堵塞策楞尋奏同知李燉守備張寶侵帑誤工狀上命斬燉寶繫高斌張師載使視行刑仍傳旨釋之二十年三月卒於工次子內大臣銜發內庫銀一千治喪二十二年上南巡諭曰原任大學士內大臣高斌任河道總督時頗著勞績卽如毛城舖所以分洩黃流高斌設立徐州水誌至七尺方開後人不用其法遂致黃弱沙淤隱貽河患其於黃河兩岸汕刷支河每歲冬季必率廳汛填築近年工員疏忽因有孫家集奪溜之事至三滾壩洩洪湖盛漲高斌堅持堵閉下游州縣屢獲豐收功在民生自不可沒癸酉張家路及運河河閘之決則其果於自信抑且年邁自滿之失在本朝河

臣中卽不能如靳輔較齊蘇勒格曾筠有過無不及可與靳輔齊蘇勒格曾筠同祀使後之司河務者知所激勸二十三年賜諡文定御製懷舊詩列五督臣中命祀賢良祠子高恒高恒子高樸皆坐事獲譴自有傳上復錄高恒孫高杞授內務府郎中從子高晉高晉字昭德父述明涼州總兵高晉初授山東泗水知縣累遷安徽布政使兼江甯織造乾隆二十年擢安徽巡撫二十二年上南巡視河命高晉協辦徐州黃河兩岸隄工高晉奏言鳳潁災區諸工並舉米價日昂動工程銀三萬兩購米尙慮不敷上念淮徐海道諸工截漕二十萬石平糶請分五萬濟上江各工從之工竟加太子少傅二十六年遷江南河道總督奏言高寶興泰積年被水上命封南關車邏等壩於金灣壩下濬引河洩水歸江使洪澤湖運河之水不致漫壩東注下河各縣支河汊港及田間積水均匯入串場河北至鹽城石碇天妃等閘出新洋港又自興化白駒青龍八社大關等閘出門龍港分二道歸海惟下河形如釜底積滯驟難消涸請浚興化迤南丁溪小梅二閘引河使出王家港興化迤北上岡草堰陳家衝三閘引河使匯

射陽湖增二道歸海俾數州縣積水節節流通沮洳漸成沃壤從之二十七年授內大臣奏言連河歸江邵伯以下舊設六閘自鹽河分流下注請將六閘金門量爲展寬又鹽河舊設中南北各二閘應留北二閘以濟鹽運南中二閘過水遲滯應添建石壩接長土隄酌挑引河俾高寶湖水歸江益暢二十八年加太子太傅二十九年奏言清口以上桃宿等廳專受黃水清口東壩以下淮黃合流至雲梯關迤東歸海北岸五套南岸陳家浦頂衝入溜議培築舊隄臣以雲梯關外近海與其築隄束水不若於舊隄上首作斜長子堰使水匯正河入海上均是之三十年遷兩江總督仍統理南河事務三十一年按蘇州同知段成功縱僕擾民高晉以成功方病擬寬之上責其袒庇三十三年署湖廣總督兼攝荊州將軍事三十四年回任兼署江蘇巡撫上命採洋銅鑄錢高晉請收小錢並運雲南銅供鑄省於洋銅上用其議三十六年兼署漕運總督授文華殿大學士兼禮部尙書仍任總督如故尋命同侍郎裘曰修總督楊廷琮籌勘永定河工事竟還江南四十年河東河道總督姚立德奏請以蜀山湖收蓄

伏秋汎水工部以舊例蜀山湖於十月後收蓄汶河清水議駁上命高晉會勘  
尋奏蜀山湖周六十五里在汶河南運河東爲第一水櫃向定蓄水限九尺七  
八寸請改以一丈一尺爲率兼蓄伏秋汎水從之四十一年河督吳嗣爵奏黃  
河淤高命高晉與總督薩載籌議請浚清口以內引河停淤使清水暢出與黃  
河匯流東注並力剔沙則黃河不濬自深海口不疏自治上諭曰此奏甚合機  
宜形勢爲治淮黃一大關鍵屆時妥爲之是冬入覲上以高晉年七十書勝以  
賜四十年命赴浙江會巡撫王賈望相度海塘又命赴河南堵築儀封漫口  
秋河決時利驛高晉請議處命寬之冬時利驛工竟儀封新修埽工墊陷部議  
奪官仍命留任十二月卒賜祭葬諡文端懷舊詩并列五哲臣中子書麟廣興  
自有傳

完顏偉完顏卽其氏滿洲鑲黃旗人雍正間自內務府筆帖式累遷戶部員外  
郎命往江南學習河務乾隆二年授浙江海防道調江南河務道尋擢浙江按  
察使方建尖山壩工巡撫盧焯奏以偉督工歲資銀五百六年命爲江南副總

河就掘河道總督高郵南關五里車邏三壩值河湖盛漲洩水輒浸下河州縣民田上命閉洪澤湖天然壩及三壩不使水入下河知州沈光曾以上河濱湖灘地被水議以濟運餘水由三壩減洩並易芒稻河開爲壩疏寶應高郵甘泉諸湖南注之路偉劾其擾亂河工光曾坐奪官初上以黃河大溜逼清口命循康熙舊迹開陶莊引河導使北注大學士鄂爾泰與河道總督高斌合勘甫定議會暴汛積淤工遂停高斌亦去任復命偉相度偉議自清口迤西黃河南岸設木龍挑溜使漸趨而北七年疏言淮源上游雨多水發賈魯河盛漲由渦達淮匯于洪澤湖三石滾壩減歸高寶邵伯等湖而古溝東壩漫刷過水又自白馬湖來會水勢益大臣督築子堰捍禦並開高郵老土壩及南關等三壩水勢始定上嘉之是歲黃河亦盛漲石林口減水過多沛縣及山東魚臺滕嶧諸縣皆被水偉具疏請罪御史吳煒劾偉用人不得當偉疏辨上不深責調河東河道總督九年奏言山東歷年被水由於上游散漫下游梗阻連河東接汶泗沂濟諸水洩入微山蜀山南旺馬踏諸湖北接漳衛二水洩入鹽河徒駭馬賴鉤

盤諸河遇伏秋異漲宣洩不及應於運河內增開壩以分其勢疏下河以暢其流其經由各州縣凡溝渠淤狹者浚之隄堰殘缺者修之報可十年以母老乞回京有旨慰留十三年授左副都御史旋卒

顧琮字用方伊爾根覺羅氏滿洲鎮黃旗人尙書顧八代孫父顧儼歷官副都統顧琮以監生錄入算學館修算法諸書書成議叙康熙六十一年授吏部員外郎雍正三年授戶部郎中遷御史四年巡視長蘆鹽政八年遷太僕寺卿九年授新州營田使十一年協理直隸總河遷太常寺卿署直隸總督尋授直隸河道總督十二年奏報永定河口深通上流始得暢注入淀近因淤議濬引河自然開刷不勞民力號爲天賜引河上令報祀疏請更定管河廳汛增設員缺下部議行乾隆元年署江蘇巡撫丁父憂回旗二年命協辦吏部尙書事永定河決命偕總督李衛督修旋署河道總督三年正月改授朱藻命協同辦理奏畿輔西南諸水匯於東西兩淀淤墊漫溢爲患請設堡船撈泥以三角淀通判清河同知司其事藻罷去復授河道總督五年濬青縣興濟滄州捷地兩減河



疏陳善後諸事請疏海口築遙隄多設涵洞六年請改定子牙河管河官制尋以裁缺回京六年授漕運總督七年奏言清江以上運河兩岸向來只知束水濟運未知借水灌田坐聽萬頃源泉未收涓滴之利同此田畝淮南淮北腴瘠相懸或疑運河洩水於濟運有妨不知漕艘道經淮徐五月上旬即可過竣稻田須水正在夏秋間若屆時始行宣導是祇借閉蓄之水爲灌溉之資於漕運初無所妨況清江左右所建涵洞成效彰彰推此仿行萬無疑慮請特遣大臣總理相度會同督撫河臣詳酌興工議未及行八年以督運詣京師入對請行限田上斥其擾民十年六月疏請於馬莊集曹家店各建石閘束上游之水並將駱馬湖入運處改在阜湖以上乾車頭建閘挑渠引水濟運十字河竹絡壩開放後黃水湍激橫截運河糧艘提溜爲難當於竹絡壩下東黃壩迤東接堤堵截別於蘇家閘南濬河越黃入運從之十一年署江南河道總督十二年命偕大學士高斌按浙江巡撫常安貧婪狀坐未窮治奪官命留任尋調河東河道總督十七年疏言運河隄未設堡房請視黃河例每二里建堡房都計四百

餘座十九年坐江南總河任內浮費工銀奪官旋卒顧琮內行嚴正嘗入對值  
旱多風世宗以爲憂顧琮引洪範謂蒙恒風若慮臣或蔽君上爲之動容世宗  
崩顧琮方喪偶逾三年乃續娶方苞以爲合禮

白鍾山字毓秀漢軍正藍旗人雍正初自戶部筆帖式遷江南山清裏河同知  
累擢江蘇布政使奏狼山蘇松二鎮駐地距蘇州俱遠軍糈輓運維艱請就所  
駐及附近州縣配給崇明孤懸海外地不產米請由江廣採運撥萬石貯崇明  
倉備平糶海濱漲出沙洲民人占居當築土墩以避潮患從之十二年授南河  
副總河旋擢河東河道總督乾隆元年奏河標兵駐濟甯無倉儲每稱貸貴糶  
請以生息銀二千七百有奇買穀四千石設倉存貯春借秋收又奏豫東河防  
水落時當堵塞支河伏秋水漲購料募夫每慮不及請發河南山東司庫銀分  
存鄭州及武涉封邱曹單諸縣永遠貯備皆從之四年疏言漳水舊自直隸入  
海康熙四十五年引漳入衛濟運故道漸淤全歸衛河勞難容受嗣於德州哨  
馬營建滾水壩開引河洩衛水由鈞盤河達老黃河入海然漳衛二水隨時淤

塞盧糜帑金漳水舊有正河支河應擇易浚者復其故道於館陶建閘衛水大  
聽漳入海以防漲衛水小分漳入衛以濟運奏入命大學士鄂爾泰詳議議在  
邱縣東和爾寨村承漳河北折之勢接開十餘里至漳洞村入舊河因於新河  
東流入衛處建閘以時啓閉上從之時漕運總督補熙請造十丈大船運河當  
以水深四尺爲則白鐘山謂牐河無源之水兩至而後泉旺泉旺而後河盈上  
牐閉下牐啓則下牐倍深上牐倍淺各牐相距遠近不均水近者深則遠者必  
淺以人役水以水送舟必不能均深四尺侍郎趙殿最又請於館陶臨清各立  
衛河水則白鐘山謂尺寸不足將衛輝民田渠牐盡閉致妨灌溉事旣難行尺  
寸旣足將官渠官牐盡閉來源頓息下流已逝運河之水亦立見消涸二者均  
屬非計議並寢八年調江南河道總督疏言石林口堵築堅固大溜直趨下流  
黃村韓家塘等處新築子堰恐不足抵禦於對岸濬引河導溜南注並加厚子  
堰派兵駐防又奏言葦蕩左右兩營歲輸柴二百二十五萬束積久生弊輪運  
不齊請禁兵民雜採定採葦期限漕運柴溝渠編柴船幫號皆允行十一年御

史楊開鼎劾白鍾山出納愷各任情駁減用損工偷縱僕役婪索陳家浦決七百餘丈止稱二十餘丈興築延緩阜甯鹽城二縣受其害命高斌會尹繼善按治以開鼎從尋覆奏駁減婪索無實據惟陳家浦漫口衝刷貽害累民上召白鍾山詣京師奪官效力河工總河顧琮復論白鍾山措處失當上命籍其資逾十萬以償十五年授永定河道十八年河決張家路命從尙書舒赫德往勘旋命以按察使銜協辦南河事十九年復授河東河道總督二十年署山東巡撫請罷孔氏世襲曲阜知縣上命改授世襲六品官尋奏濟甯以南積水未消請緩開汶河大壩疏濬下游河道上命白鍾山往勘南河文武各官聽調遣二十二年調江南河道總督疏言自河決張家路沙停河淤下流不暢南高北窪迨孫家集復決河底益高黃河受病率由水勢側注北岸冲刷溝槽惟有南北分籌南宜疏北宜築築則支河不致奪溜疏則稍分有餘之水勢庶徐州得以少安臣與河臣張師載商榷以爲南岸長灘較北岸更險必於橫亘處濬引河導溜歸中岸隄益加高厚北岸無隄漫水如梁家馬路徐家山等處支河數十道

及黃家莊郭家堂等處漫槽矮灘宜築土壩水平則收束以刷正河水漲則平漫平消不至沖槽奪溜並於孫家集培隄增壩以爲重障駱馬湖北受蒙陰山水西受微山湖水其尾閘在六塘河上游湖隄在在殘缺亟應修補捍防皆從之荆山橋工竟議叙奏言甯夏上游河水陡漲急報下游防範正陽關爲淮水上下關鍵應仿甯夏水報法派員專司其事又奏上江諸水皆歸安河以達洪澤湖安河間段淤淺連年水患由此宜多募漁船伐蘆撈泥俾尾閘一通上游皆有去路又歸仁隄下舊有涵洞穿鮑家河以達安河久經湮塞擬開浚分林子河一支則安河進水之地亦有所分患可漸減報聞二十三年加太子少保二十六年卒贈太子太保賜祭葬諡莊恪

論曰自靳輔治河淮繼其後者疏濬修築守成法惟謹世宗朝齊蘇勒最著稽曾筠高斌皆仍世繼業與靳輔同祠河上有功德於民克應祭法完顏偉顧琮白鍾山隨事補苴不負當官之責高斌任事二十年疏毛家鋪引河排衆議行之民蒙其利奪淮之役縛赴工次待決雷霆不測之威赫矣哉

清史稿

列傳九十八

哈攀龍

子國興

任舉

冶大雄

馬良柱

本進忠

劉順

哈攀龍直隸河間人其先出回部乾隆二年一甲一名武進士授頭等侍衛以副將發福建除興化城守副將遷總兵歷河南南陽福建海壇漳州諸鎮以母喪去官十三年高宗東巡攀龍迎鑾命往金川隸總督張廣泗軍署松潘鎮總兵出美諾溝取撒臥山大松林噶達諸寨分兵出馬溝右梁察形勢得其險要搜截松林賊蔽松設卡毀其二徑左梁山溝殲賊數十進克渴足寨焚碉寨四水城一殺賊二十餘尋與署重慶鎮總兵任舉合兵攻色爾力石城舉沒於陣攀龍入林殲賊三十餘奪舉尸回復偕都統班第署重慶鎮總兵段起賢侍衛富成分道夜襲色爾力焚木卡三殺賊五十餘進破石梁雙溝諸壘經略訥親總督張廣泗勦攀龍攻色爾力不能下兵部議左遷上責攀龍自陳攀龍言

屢克卡殺賊報廣泗廣泗不以入告會訥親廣泗皆得罪去上知攀龍枉命罷議尋從經略大學士傅恒夜攻色爾力先登拔石卡殲賊數十四年金川事定命署固原提督十六年移湖廣提督陳整飭弁兵諸事上嘉勉之尋命真除復移貴州提督入陛見病留京師卒子國興乾隆十七年武進士授三等侍衛出爲雲南督標右營遊擊遷東川營參將緬甸頭人召散據孟艮爲亂總督楊應琚檄國興佐軍戰楞木進克猛卯督戰被鎗創右輔及臂應琚以聞賜孔雀翎尋署騰越營副將時副將趙宏榜以偏師深入與緬人戰於新街師敗績國興師至蠻莫訓新街無備督兵潛入緬人乃引退從將軍明瑞進克木邦戰於蠻莫大破之復偕侍衛莽克察擊斬守隘賊六十餘擄楚姚鎮總兵入陛見命在乾清門行走資銀幣還軍移普洱鎮總兵遷貴州提督經略傅恒議用水師令國興赴銅壁關外野人山督造船移雲南提督加太子少保船成從傅恒出猛拱孟養南豐猛烈猛壩次老官屯緬人水陸備甚固攻之不時下頭人諾爾塔以其酋僧跋命遣使得魯蘊詣軍乞解兵傅恒令國興出見曉以利害令具

約十年一貢毋更擾邊歸所掠內地人緬人誓奉約時傅恒方病將軍阿桂召從征諸大臣議皆言許之便遂與定約解兵旣而貢弗至總督彰寶遣都司蘇爾相諭意留不遣揚言國興許以木邦猛拱蠻莫三土司予緬人請如議彰寶効國興與緬人議具約不以實上召國興至京師詰國興國興自陳未嘗有此議上責國興遷就畢事奪太子少保左授貴州古州鎮總兵移雲南臨元鎮後二年得魯蘊復至老官屯請如前誓三事時師征金川上命國興從將軍溫福進討三十七年遷西安提督命盡護陝西甘肅從征諸軍尋令偕總兵董天弼自曾頭溝取底木達布朗郭宗溫福以國興能軍令自策卜丹徑取美洛當一面國興自阿喀木雅山溝紆道徑瑪爾迪克山寨察策卜丹地勢林深徑狹不宜於行師乃將二千人佐海蘭察攻瑪爾迪克溫福再疏聞上金川賊千餘屯貢噶山左謀劫糧國興馳擊賊敗匿師還經瑪爾迪克賊自林中出復擊敗之上賚荷包四進攻貢噶山設伏斬賊百餘搜奪礮卡九月金川酋索諾木使詣國興請獻鄂克什地以降國興令併割南北兩山美美卡木蘭壩及瑪爾迪



克越日賊盡撤諸柵國興以兵入鄂克什舊寨賊退守路頂宗十月使歸墨墨  
溝師敗時所掠外委賊儒且言營勸僧格桑同降溫福以聞上令國興檄諭索  
諾木聲其罪時國興及海蘭察將五千人屯貢噶山謀攻策卜丹阻冰雪未進  
上命還師攻路頂宗路頂宗山麓有巨溝溝源出南山海蘭察紆道出山後侍  
衛額森額自小徑爲應國興前越溝攻碉師繼進遂克路頂宗破卡五十餘碉  
三百餘俘獲甚衆復自喀木色爾北山攻穆拉斯郭大寨進據兜烏山巔與總  
兵馬彪軍合奪附近碉卡克額爾莽木柵復將千人渡水自南山鄂爾齊仰攻  
克諸寨與大軍會進攻明郭宗別以兵襲擊公雅山克木爾古魯寨並奪據嘉  
巴山麓廷議既定小金川分命將帥三道進討金川上曰國興雖綠營漢員熟  
軍事又嘗爲乾清門侍衛與滿洲大臣無異授參贊大臣佐副將軍豐昇額是  
月克明郭宗焚念經樓整兵進取日果爾烏山麓攻美諾上嘉國興功官其子  
文虎守備攻克布朗郭宗僧格桑通金川我軍直抵底木達僧格桑父策旺出  
降小金川平國興卒於軍賜白金千存恤其家加贈太子太保諡壯武祀昭忠

祠圖形紫光閣文虎授陝西提標右營守備從軍攻木果木陣沒從祀昭忠祠  
復官次子文彪千總

任舉山西大同人雍正二年武進士以守備發陝西累遷固原提督左營遊擊  
署城守營參將乾隆十一年二月固原兵變夜攻提督許仕盛毀轅門將入舉  
聞亂單騎詣鼓樓鳴角招營兵未變者纔五十人部勒使成列變兵懼退掠市  
塵舉追及手刃五十餘人禽四十餘人變兵出城南門還攻東西二門舉守東  
門右營遊擊鐵保守西門禦戰變兵潰事定總督慶復以聞擢中軍參將十二  
年命征金川隸總督張廣泗軍尋授西鳳協副將舉至軍與總兵許應虎副將  
高宗瑾參將賈國良攻色底賊礮擊以礮二百餘發礮一角比垣鑿孔發礮密  
如鱗比舉度我軍礮小不能下將移軍退守賊出戰再設伏敗之十三年上諭  
謂在軍諸將狃於瞻對之役庸懦欺蒙已成夙習今別用舉等皆未從征瞻對  
無所掣肘宜鼓勵勇往廣泗亦奏在川鎮將忠誠勇幹無出舉右者令率漢土  
兵三千取道攻昔嶺尋又奏令署重慶鎮總兵舉與參將王愷自牛廠至素可

尼山時五月遇大雪關道以行經撤烏山至昔嶺山梁山北曰木岡孤峯當道賊置城卡守隘舉督兵攻卡憑高發礮洞其垣令士兵緣溝潛進燬賊碉師循山腰克賊卡遂陟中峯以千人駐守進攻木岡時總兵哈繁龍帥至馬溝右梁阻松林不得進廣泗令自納喇溝出昔嶺右與舉合攻木岡賊所置城卡力戰未卽下舉察昔嶺左有道通卡撤中經得思東木達溝賊皆置碉焉總兵冶大雄方自卡撤進舉與合軍焚木達溝諸碉圍得思東斷其汲道督兵挾斧斫賊賊墮巖遁得大小礮三進攻色爾力石城分兵爲三道舉督兵直攻石城攀龍出其右副將唐開中及國良出其左越溝度林攻賊所置木城國良戰死六月己巳舉與攀龍開中合攻石城城堅甚我師方力攻賊三百餘自西南林內出舉督兵與戰被創戰益力槍復中要害遂卒攀龍入林殺賊以其尸還時上方命舉員除經略大學士訥親以舉死事聞上閱疏爲泣下並諭舉忠憤激發甘死如飴而朕以小醜跳梁用良臣於危地思之深惻命視提督例賜卹加都督同知諡勇烈祀昭忠祠官其子承恩都司承緒千總承恩喪終入謝上以尙

幼命傳諭其母善教之二十四年授三等侍衛累遷福建陸路提督五十二年  
臺灣林爽文爲亂承恩請往討之師無功逮詣京師罪當死上寬之五十三年  
赦出獄五十五年復授巡捕營參將遷副將卒承緒官巡捕營遊擊市中火赴  
救被創卒上之赦承恩謂其未有子承緒又死勤事不可使舉無嗣也

冶大雄四川成都人康熙季年入伍從征西藏克裏塘巴塘降結敦落籠宗說  
板多打籠宗諸寨獲爲亂喇嘛五雍正初從軍出松潘黃勝關剿撫熱當十二  
部落攻郭隆寺攻嶺三破寨十五追斬康布喇嘛於西海又從征卓子山蒼子  
山戮頭人追剿羅卜藏丹津擒丹津琿台吉川陝總督岳鍾琪疏薦引見特授  
藍翎侍衛累遷陝西莊浪營參將加副將銜賜孔雀翎命赴巴里坤軍機署川  
陝督標中軍副將準噶爾犯克什圖岷嶺破諸卡倫大雄偕總兵樊廷以二千  
人當賊二萬轉戰七晝夜拔守卡倫兵以出與總兵張元佐等師會力戰殺賊  
賜拜他喇布勒哈番世職資白金五千尋授直隸山永協副將命署湖北彝陵  
鎮總兵上言彝陵距省千餘里兵餽歲以四季支給請改夏秋冬春二次彙支

下督撫議行尋調署山西大同鎮總兵與前任總兵李如柏互劾均奪職乾隆  
元年以副將發湖廣尋授衡州協副將城綏苗搖爲亂大雄駐長安堡焚賊寨  
截其渠餘相率就撫擢鎮總兵總督孫嘉淦劾大雄貪縱奪職湖南巡撫  
蔣溥言讞無貪縱迹引見復授雲南昭通鎮總兵叙剿苗功加都督僉事銜十  
三年從征金川至卡撒統雲南貴州諸軍進攻色底光多諸寨引兵出昔嶺中  
峯之西與署總兵哈攀龍任舉師會克大小碉十石城一墮碉百三十同攻克  
昔嶺溝底石城水卡經略大學士傅恒奏大雄歷經戰陣令總理營壘措置妥  
協賜孔雀翎金川頭人莎羅奔等乞降師還授雲南提督加左都督銜入覲官  
其子繼鈞藍翎侍衛命送大雄上官疏言西藏喀拉烏蘇諸地與準噶爾連界  
盜竊紛擾是其故習今藏北鄙卽我邊地防邊自可弭盜請駐藏大臣仍設重  
兵循大道置驛站以資防守上嘉其留心繼鈞至常德迎家中途假回民金大  
雄以聞上以大雄知事不可揜乃始奏劾左授哈密總兵命署安西提督赴巴  
里坤驗馬駝疏報四千餘會總督方觀承核參將鍾世傑等至巴里坤領馬千

九百餘途中馬多死論罪上以大雄疏不實下部議總督黃廷桂復劾大雄命奪官逮京師治罪二十一年四月行至西安卒三十二年上以緣營世職不得世襲罔替下兵部察諸將有功者俟襲次畢賜恩騎尉世襲罔替大雄與焉馬良柱甘肅張掖人其先本回部康熙季年從軍征吐魯蕃雍正初將軍阿爾那檄赴插漢麥里干討賊皆有功復從安西鎮總兵孫繼宗攻羅卜藏丹津降台吉三十三戰於哈馬兒打布罕噶斯禽其渠授藍翎侍衛賜白金百遷三等侍衛外授四川提標遊擊賜貂皮數珠命將兵屯西藏旋以兵擾民左降聽四川巡撫提督調遣八年瞻對土司爲亂提督黃廷桂檄良柱討之賊堅守石碉督兵仰攻槍殪所乘馬易馬進再殪乃步行督戰碉上投石如雨傷面搏賊益奮火其碉並焚擦馬擦牙諸寨殲賊無算側冷邦諸頭人皆降復授松潘鎮左營遊擊三遷夔州協副將乾隆十年師復征瞻對破直達松多諸寨奪碉七十餘進攻下密左山梁獲頭人噶籠丹坪再進克下密等百餘寨獲頭人塔巴四交渡了魯河遂破瞻對焚其寨其渠姜錯太死於火十二年大金川曾沙羅奔

改革什咱土司並掠明正土司所屬魯密章谷諸地巡撫紀山移良柱威茂協副將督兵防禦沙羅奔糾小金川土司澤旺侵沃日各寨都司馬光祖赴援賊大至光祖困於熱籠良柱率輕騎馳救敗賊巴納山進克石卡二百二十三光祖等出應賊潰圍解澤旺降並還所侵沃日三寨詔嘉其奮勇遷重慶鎮總兵再進復孫克宗官寨攻江卡戰屢勝克太小碉寨百餘降二十餘寨進克丹噶山分兵焚撤籠等七寨噶固等寨先後降賊守石達大碉良柱冒雨進數十戰賊乘夜來撲營設伏殲焉馬邦頭人思錯已降總兵許應虎馭之不以道復叛圍應虎於的交良柱馳救賊退入戎布寨攻之未下旋復犯馬邦副將張興被圍良柱請移戎布師赴援總督張廣泗不許興陷於賊侵噶固守兵叛附賊奪卡倫七廣泗令良柱往攻力戰賊未卻值大雪二十餘日糧匱煮鎧弩以食力不支廣泗檄退師倉卒移營礮械爲賊得廣泗劾之命逮詣京師良柱陳糧絕狀上特原之命在香山教禁軍雲梯親臨觀之良柱起舞鞭稱旨賜大緞荷包命仍赴金川軍以副將參將等官酌量委用尋授泰甯協副將大學士傅恒視

師檄良柱攻昔嶺克之莎羅奔請降良柱以十餘騎入其營宣諭授建昌鎮總兵賜孔雀翎母憂去官召入京師仍令教禁軍習雲梯服閱授松潘鎮總兵雜谷土司蒼旺爲亂偕提督岳鍾琪討平之尋請老改籍四川華陽卒年八十一良柱頽然大目虬髯邊人畏之號爲獅子頭善戰臨陣手鐵鞭一馬上旋轉如飛其攻噶固廣泗不爲策應餒又不時至上知廣泗忌其成功故特輕其罰云子應詔官直隸河間副將孫瑜自有傳

本進忠甘肅西寧人初入伍冒姓名曰張元吉尋請復姓名雍正中從揚武將軍張廣泗援吐魯番屯魯克沁準噶爾來侵邀擊禽賊七復追敗之哈喇和卓乾隆十三年檄赴金川從征囊得山梁攻碉先登奪矛中石傷從攻普沽擲火彈入碉焚碉十三奪木城進戰於樂利噶爾隄克殲賊攻碉右股中槍傷錄功擢四川威茂協右營都司引見賜大緞雜谷土司蒼旺爲亂提督岳鍾琪檄進忠討之奪銅礮一斬馘數十生禽二十五降茶堡番民二千餘自角木角溝入雜谷獲蒼旺累擢永寧協副將三十年從將軍明瑞征緬甸進攻蠻結克木卡



十六殲賊三傷額明日仍裹創出戰事聞賜孔雀翎號法式善巴圖魯擢雲南  
臨元鎮總兵明瑞令將五千人屯龍陵關備調遣召詣熱河行在入見命乾清  
門行走賜貂皮銀幣令還軍旋移普河鎮總兵擢雲南提督卒加太子太保諡  
勤毅

劉順順天人雍正五年武進士授藍翎侍衛以守備發陝西累遷至金塔協副  
將乾隆十三年令將千五百人赴金川偕副將高雄自甲索攻囊得道松林賊  
百餘出戰擊之遁燬賊碉從大軍自卡撒左山梁進諸碉以次皆下惟普瞻雙  
單二碉守甚堅日暮將收兵順潛率所部逼單碉縱火攻之賊潰並奪雙碉師  
繼進遂克色底普瞻西有山曰阿利賊碉林立順冒雨奮攻奪山梁木卡破碉  
發礮殲賊數十復破大碉一石卡四經略訥親履奏順奮勇金川平擢貴州威  
寧鎮總兵上以順熟邊情移甘肅西寧鎮總兵入見賜孔雀翎擢安西提督病  
乞罷卒加太子太保諡壯靖

論曰初征金川擊龍舉大雄皆以勇略著舉尤驍桀爲軍鋒訥親張廣泗督戰

急鼓銳攻堅遂以身徇傷已良柱善戰又以廣泗牽制不能盡其材進忠順力戰破堅壘亦攀龍輩之亞也

清史稿

列傳九十九

傅清

拉布敦

班第

鄂容安

納穆札爾

三泰

傅清富察氏滿洲鑲黃旗人李榮保次子傅恒弟也雍正間授侍衛乾隆初累遷至直隸天津鎮總兵康熙中定西藏留兵鎮撫以大臣駐藏辦事爲員二嗣省其一足時駐藏副都統索拜當代命傅清以副都統往十一年疏言西藏處徼外西北界準噶爾北通青海爲四川西南外郭自雍正十二年設塘汛不特傳送官文書且以聯絡聲氣上年索拜以節費議撤汛使藏人任郵遞謂之番塘未幾輒被盜今準噶爾當入藏然番塘恐滋誤請自打箭鎗至藏復置塘汛酌衝僻遠近當得兵千人以內議如所請十二年西藏郡王頗羅鼐卒頗羅鼐愛其次子珠爾默特那木扎勒請以爲嗣遂襲爵爲郡王上諭傅清曰頗羅鼐更事多黽勉事中國珠爾默特那木扎勒幼傅清宜留意如珠爾默特那木

扎勒思慮所未至當爲指示傳清疏言頗難在時長子公珠爾默特策布登  
出駐阿里克夏當令珠爾默特那木扎勒帥師出駐騰格里諾爾喀喇烏蘇諸  
處今仍遣珠爾默特策布登駐阿里克夏令別道宰桑駐騰格里諾爾喀喇烏  
蘇諸處又以準噶爾入藏熬茶請增兵分路防護上命與珠爾默特那木扎勒  
商權毋涉張皇十三年命以提督拉布敦代傳清還復授天津鎮總兵遷古北  
口固原提督珠爾默特那木扎勒請撤留藏兵上從之旋以副都統紀山代拉  
布敦十四年紀山疏言珠爾默特那木扎勒與達賴喇嘛有隙請移達賴喇嘛  
置秦寧上知珠爾默特那木扎勒乖戾且爲亂命駐藏大臣復舊置二員予傳  
清都統銜自固原復往紀山復疏謂珠爾默特那木扎勒言其兄珠爾默特策  
布登將舉兵相攻上命傳清途中調虛實傳清疏言珠爾默特策布登未嘗構  
兵特珠爾默特那木扎勒妄言藉以奪其兄分地臣至藏卽將珠爾默特那木  
扎勒懲治是時上已遣侍郎拉布敦代紀山因諭傳清珠爾默特那木扎勒乖  
戾且爲亂令熟計密奏十五年傳清與拉布敦先後至藏珠爾默特那木扎勒

迫其兄珠爾默特策布登至死遂逐其子遣使通準噶爾叛益有迹上命副都統班第赴西藏與傅清拉布敦密謀取進止仍詔傳清拉布敦毋輕發並密諭四川總督策楞勒兵爲備珠爾默特那木扎勒謀愈急絕塘汛軍書不得達傅清與拉布敦未得上詔計以爲珠爾默特那木扎勒且叛徒爲所屠亂旣成吾軍不得卽進是棄兩藏也不如先發雖亦死亂乃易定十月壬午召珠爾默特那木扎勒至通司岡駐藏大臣署言有詔使登樓預去其梯若將宣詔珠爾默特那木扎勒方拜跪傳清自後揮刀斷其首於是其黨羅卜藏札什始率衆圍樓數重發鎗礮縱火傳清中三創度不免自剄死拉布敦死樓下主事策塔爾參將黃元龍皆自殺通判常明中矢石死從死者千總二兵四十九商民七十  
七事聞上軫悼宣示始末謂其揆幾審勢決計定謀心苦而功大傳清追封一等伯諡襄烈旋命立祠通司岡喪還上臨奠其子孫以一等子世襲賜白金萬班第至藏戮羅卜藏札什等疏陳珠爾默特那木扎勒自立名號通款準噶爾稱策旺多爾濟那木扎勒爲汗請其發兵至札達克爲聲援上復降詔褒傳清

拉布敦建祠京師命曰雙忠子明仁以待衛襲子爵從征金川卒於軍

拉布敦棟鄂氏滿洲鑲紅旗人其先對齊巴顏於太祖時率所部來歸語見阿蘭珠朗格諸傳父錫勒達事聖祖自贊禮郎累遷吏部尚書出署川陝總督還京師以鎮箠苗爲亂命偕副都統圖斯海徐九如帥師討之降三百一寨勦十五寨錫勒達與荊州副都統珠滿湖廣提都俞益謨所勘定者天星龍椒洞排六梁等三寨亂定與總督于成龍巡撫趙申喬議立營汛增設官吏爲撫綏復還京師卒拉布敦其第六子也生有力能彎十力弓左右射工詩文習外國語言康熙間襲叔祖勒爾圖三等阿達哈哈番世職雍正朝從傅爾丹討準噶爾戰於和通呼爾哈訥爾又從策凌討準噶爾戰於額爾德尼昭皆有所斬馘授世管佐領上命軍中舉驍勇之士拉布敦與焉賜孔雀翎乾隆初累遷正紅旗滿洲副都統八年復討準噶爾授參贊大臣出北路九年授定邊左副將軍其冬疏言厄爾特宰桑額勒慎等內牧布爾吉推河烏梁海得木齊札木禪內牧布延圖河源布爾吉推河在阿爾台山梁外布延圖河源在阿爾台山梁內距

卡倫不遠已割坐卡侍衛等嚴防十年冬疏言烏梁海得木齊烏爾巴齊等避雪內牧黃加書魯克距卡倫不遠託爾和烏蘭布延圖哈瑪爾沙海諸卡倫外皆有準噶爾人蹤跡仍割坐卡侍衛等嚴防尋召還京師授正白旗滿洲副都統復出署古北口提督十三年駐藏副都統傅清當代命拉布敦往十四年召還以紀山代授工部侍郎未終歲上徵紀山還復命赴藏十五年授左都御史尋與傅清謀誅珠爾默特那木扎勒其黨羅卜藏扎什圍樓拉布敦挾刃躍下樓擊殺數十人自剖其腹死上聞贈爵賜金立祠如傅清命以拉布敦之族升隸正黃旗謚壯果子隆保以侍衛襲子爵誤班奪官爵除

班第博爾濟吉特氏蒙古鑲黃旗人康熙間自官學生授內閣中書五遷雍正初至內閣學士四川雲南微外與西藏定界命偕副都統鄂齊如西藏宣諭遷理藩院侍郎坐事左遷在內閣學士上行走十一年命在軍機處行走乾隆三年授兵部侍郎外擢湖廣總督勦鎮竿永綏亂苗兩閱月而畢上嘉焉五年以憂還京師六年命仍在軍機處行走授兵部尚書十三年師征金川授內大臣

出督軍饒加太子少保尋按四川巡撫紀山加徵累民狀命卽署巡撫時訥親張廣泗師久無功上詔班第但言廣泗罪狀語不及訥親上諭曰班第雖職饒然爲本兵軍機大臣軍事及將弁功罪皆職掌所在不得以督饒一切置不問左遷兵部侍郎十四年予副都統銜赴青海辦事西藏郡王珠爾默特那木扎勒有叛迹駐藏辦事大臣傅清拉布敦疏聞上移班第代拉布敦未至珠爾默特那木扎勒謀益急傅清拉布敦召至解誅之其徒卓呢羅卜藏扎什等遂叛傅清拉布敦死之公班第達執卓呢羅卜藏扎什等班第至按訊又得其黨德什奈等凡二十七人悉誅之上以藏酋授王爵名位過重命班第達以公爵管格隆事令班第宣諭班第又疏陳珠爾默特那木扎勒與準噶爾通書謀叛狀上命誅珠爾默特那木扎勒妻子四川總督策楞等以師至會議西藏善後諸事西藏大定十六年授都統銜十七年還京師仍在軍機處行走授正紅旗漢軍都統出署兩廣總督十九年師征準噶爾復授兵部尙書署定邊左副將軍出北路準噶爾內亂輝特台吉阿睦爾撒納來降詔以明歲進兵諭班第籌畫



班第以軍中駝馬牛羊宜牧地得扎布堪呢圭諸處冬令暖富水草令喀爾喀親王額琳沁多爾濟等往督牧遣兵擒烏梁海宰桑車根赤倫等收其衆數千戶復令參贊大臣薩喇爾將兵擒準噶爾宰桑庫克新瑪木特通瑪木特收其衆得牲畜無算上獎班第奮勇果斷予子爵世授正黃旗領侍衛內大臣賜白金千十二月授定北將軍召來京示方略二十年正月大舉討準噶爾班第出北路阿睦爾撒納授定邊左副將軍爲副永常以定西將軍出西路薩喇爾授定邊右副將軍爲副班第與阿睦爾撒納等議以二月出師阿睦爾撒納將六千人先行班第將二千人繼其後班第至齊齊克涼爾以馬不給令千五百人先留五百人待馬再進至喇托輝與阿睦爾撒納軍合上以阿睦爾撒納爲準噶爾人所知令其前行易招撫戒班第仍令阿睦爾撒納先行毋合軍班第至額爾得里克復令阿睦爾撒納先行四月師至博羅塔拉得達瓦齊所遣徵兵使者知伊犁無備班第謀約西路軍銳進五月遂克伊犁達瓦齊以萬人保格登山侍衛阿玉錫以二十餘騎擊之驚走上獎班第功封一等誠勇公賜寶石

頂四團龍補服金黃纒朝珠班第以伊犁厄魯特生計甚艱不足供大兵六月  
疏請留察哈爾兵三百喀爾喀兵二百移駐伊犁河北尼楚袞治事諸軍次第  
遣還是月獲達瓦齊獻俘京師軍初出上察阿睦爾撒納有異志令班第嚴約  
束及伊犁既定上令和碩特四部部置汗將以阿睦爾撒納爲輝特汗阿睦爾  
撒納覲總統四部意不懽置副將軍印不用用故準噶爾台吉噶爾丹策凌菊  
形小印檄諸部諱其降言以中國兵定亂叛迹漸著上召阿睦爾撒納以九月  
至熱河行在行飲至禮與他部汗同受封參贊大臣色布騰巴爾珠爾率遣還  
諸軍以歸阿睦爾撒納乞代奏翼總統四部期七月俟命色布騰巴爾珠爾歸  
不敢聞以班第趣阿睦爾撒納詣熱河令參贊大臣額林沁多爾濟與俱阿睦  
爾撒納快快就道而上念阿睦爾撒納終且叛諭班第宜乘其未發討之母濡  
忍貽後患諭至阿睦爾撒納已行上又命鄂容安等擒治八月阿睦爾撒納行  
至烏隴古解副將軍印還額林沁多爾濟走額爾齊斯遂叛伊犁道梗阿睦爾  
撒納之黨克什木巴朗敦克多曼集烏克圖等作亂班第與鄂容安以五百人

拒戰自固勒扎赴空格斯轉戰至烏蘭庫圖賊大至圍合班第拔劍自刎鄂容  
安同殉上初聞班第等陷賊令參贊大臣策楞自巴里坤間使傳諭毋以身殉  
策楞聞訛傳班第等自賊中出以聞上解所佩荷包爲賜旣聞班第等死事狀  
降詔謂班第鄂容安見危授命固爲可憫然於事無補非傳清拉布敦爲國除  
兇者比二十一年師復定伊犁喪還上親臨奠並令執克什木巴朗等獻耳以  
祭又以薩喇爾同陷賊不能死令監往旁視尋視班第義烈仍如傳清拉布敦  
故事京師建祠亦曰雙忠旋復命圖形紫光閣子巴祿初以察哈爾總管從軍  
襲一等誠勇公授鑲紅旗蒙古都統從定伊犁師討霍集占授參贊大臣援將  
軍兆惠有功命駐軍和闐戰伊西洱庫爾淖爾屢敗霍集占師還加雲騎尉世  
職圖形紫光閣爲後五十功臣首出爲涼州綏遠城將軍察哈爾都統卒  
鄂容安字休如西林覺羅氏滿洲鑲藍旗人大學士鄂爾泰長子雍正十一年  
進士改庶吉士世宗命充軍機處章京乾隆元年授編修南書房行走再遷五  
年授詹事府詹事鄂爾泰承旨固辭上曰鄂容安與張廷玉子若霽皇考命在

軍機處行走本欲造就成材朕茲擢用鄂爾泰母以己意辭是時直軍機處大臣與章京皆曰行走無異辭也尋又命上書房行走七年以與聞左副都御史仲永檀密奏留中事奪職語在永檀傳八年命仍在上書房行走授國子監祭酒十年襲三等伯爵後五年加號襄勤十二年授兵部侍郎十三年出爲河南巡撫賜孔雀翎河南境伏牛山界陝西湖北二省袤延八百餘里鄂容安行部入山親勘又以界上諸關通大道易藏姦宄飭行保甲入奏上嘉焉衛輝參將阮玉堂督操鞭所部兵兵譁鄂容安疏請先治譁兵罪然後罷玉堂母令兵驕亦當上指鄂容安又令糴補諸府州縣常平倉穀都二十九萬石有奇浚治開封歸德陳州三府幹枝諸水以慎蓄洩廣灌溉上獎其留心本務十五年上巡幸河南鄂容安疏言河南士民樂輸銀五十八萬七千有奇上曰朕巡幸方岳從不以絲毫累民曾何藉於輸將且省方問俗勸恤民隱尙慮助之弗周豈容供用轉資於下鄂容安此奏失政體其以輸銀還之士民鄂容安疏請罪又言士民輸銀出本願還之恐不免胥吏中飽仍請允其奏上意終不悞還幸保定

鄂容安入見不引謝上詰責令痛自改悔不得有絲毫糜費粉飾爲補過之地十六年移山東巡撫濟南被水米貴鄂容安請用乾隆十三年例暫弛海禁招商往奉天糴運旋與東河總督顧琮規塞張秋挂劍臺河決培築運河隄自臺兒莊至德州千有餘里循隄建堡房塞太行隄涵洞以紓甯陽等縣水患十七年疏陳山東州縣吏交代庫銀倉穀多有虧缺下各府考覈又移江西巡撫十八年授兩江總督十九年疏言江南地廣事繁胥役弊滋甚淮安等府藉賑爲弊蘇州等府藉漕爲弊徐州府藉應徭爲弊當賤覈懲治令各屬胥吏遵經制原額禁僞冒及額外無名白役是年考績加太子少傅上將用兵準噶爾取達瓦齊以鄂容安年力方盛勇壯曉暢召授參贊大臣二十年永常以定西將軍出西路薩喇爾以定邊右副將軍爲副鄂容安實從諭曰漢西域塞外地甚廣唐初都護開府擴地及西北今遺址久湮鄂容安在軍凡準噶爾所屬及回部諸地有與漢唐史傳相合可援據者並漢唐所未至處當一一諮詢記載旋偕薩喇爾入告途中撫降諸部落並檄諭達瓦齊寶荷包鼻煙壺及師定伊犁是

胡中藻以賦詩誹上誅中藻爲鄂爾泰門生鄂爾泰從子鄂昌與唱和連坐上  
責鄂容安不爲陳奏行賞獨不及命與班第駐守伊犁阿睦爾撒納叛迹漸著  
鄂容安入告上令與薩喇爾率師至塔爾巴哈臺相機捕治阿睦爾撒納入覲  
中途遂叛伊犁諸宰桑應之鄂容安與班第力戰不支相顧曰今日徒死於事  
無濟負上付託矣班第自到鄂容安腕弱不能下命其僕剗刃於腹乃死故事  
大臣予諡者內閣擬二諡請上裁以翰林起家者例諡文至是擬文剛文烈上  
抹二文字諡剛烈圖形紫光閣上親爲贊有曰用違其才實予之失蓋重惜之  
也以次子鄂津襲爵官至伊犁領隊大臣坐事奪官以鄂容安長子鄂岳襲爵  
納穆扎爾圖伯特氏蒙古正白旗人都統拉錫子納穆扎爾自開散授藍翎侍  
衛累遷工部侍郎鑲藍旗滿洲副都統乾隆十五年西藏珠爾默特那木扎勒  
之亂既定命偕班第駐西藏議增設噶卜倫皆予扎薩克銜自喀喇烏蘇至庫  
車增嶺八設兵準噶爾通藏凡阿里那克桑騰格里淖爾阿哈雅克四路各於  
隘口設卡倫又有勒底雅路爲準噶爾犯藏時間道亦駐兵防守迭疏陳請皆

如議行十九年杜爾伯特諸部來降命赴北路料理游牧偕喀爾喀親王得親扎布規畫安置輝特和碩特十三旗於固爾班舒魯克杜爾伯特十旗於鄂爾海西喇烏蘇分界駐牧設卡倫防範納穆扎爾撫降人頗至當夏慮赴京領餼不耐炎暑請遣使轉饌至張家口散給及秋杜爾伯特諸旗遇霜雪損畜入告予米五百石賑撫輝特和碩特諸旗生計紉奏濟以糧畜阿睦爾撒納叛命駐烏里雅蘇臺旋移戶部侍郎二十一年和托輝特台吉青滾雜卜亦叛納穆扎爾慮喀爾喀諸部爲所動傳檄諭以利害上嘉之授參贊大臣從將軍成衮扎布率索倫兵追捕青滾雜卜十一月師至杭哈獎噶斯已近俄羅斯境捕得青滾雜卜檻送京師上獎納穆扎爾勇往封一等伯世襲號曰勳襄二十二年授工部尙書正紅旗滿洲都統命駐科布多旋又命移駐布延圖十月署定邊左副將軍二十三年議烏梁海降人曾曰察達克所屬鄂拓克置得木齊收楞額治庶事請以得木齊改佐領收楞額改驍騎校歲貢貂皮送烏里雅蘇臺資以緞布疏入如所議師討霍集占復授參贊大臣出西路尋授靖逆將軍會雅爾

哈善攻庫車及兆惠代雅爾哈善將師自阿克蘇進逼葉爾羌至喀喇烏蘇爲霍集占所圍納穆扎爾及參贊大臣三泰先奉命帥師濟兆惠軍兆惠遣副都統愛隆阿侍衛奎瑪岱來迎納穆扎爾道遣愛隆阿先還而與三泰奎瑪岱將二百騎夜進遇賊三千餘圍數重力戰矢盡遂沒於陳上聞追封三等義烈公諡武毅祀昭忠祠回部平圖形紫光閣子保甯自有傳保泰自拜唐阿累遷察哈爾都統與雅滿泰同爲駐藏大臣廓爾喀侵藏保泰坐請達賴喇嘛班禪額爾德尼避兵又匿廓爾喀未構兵前表貢方物及遣使有所請不以入奏上改其名曰俘習渾與雅滿泰同奪職荷校先後予杖者四藏事定戍俘習渾黑龍江赦還雅滿泰復授侍衛

三泰石氏漢軍正白旗人都統石文炳孫也父觀音保官至都統三泰自藍翎侍衛累遷正紅旗漢軍副都統吏部侍郎乾隆二十三年命軍機處行走調戶部侍郎命以參贊大臣行走從納穆扎爾出西路七月命納穆扎爾三泰率健銳營及索倫察哈爾兵應兆惠夜進期以黎明至兆惠軍遇賊衆寡勢不敵力



戰三泰墜馬徒步擊賊中創死三等侍衛彰武藍翎侍衛班泰管站四品花翎西拉布護軍校委署章京齊旺扎布及兆惠所遣迎師三等侍衛奎瑪岱皆死上聞追封三等子諡果勇石廷柱之裔本以散秩大臣世襲至是別授其兄祥泰散秩大臣回部平圖形紫光閣上追悼納穆扎爾三泰死事爲賦雙義詩以傳清拉布敦殉西藏班第鄂容安死伊犁相擬謂此六人者事異心同皆與國休戚之盡臣也子佛柱襲子爵散秩大臣官阿克蘇領隊大臣

論曰高宗朝徵外諸叛崔集占最桀驁耐戰方其困兆惠保葉爾羌非師武臣力殘不能克阿睦爾撒納既叛師未接輒遠竄非崔集占比也珠爾默特那木扎爾欲背中國乃汗準噶爾尤愚妄殆不足數六臣所遇異故其效亦殊大誅既加罪人斯得咸服稟稱義烈矣

清史稿

列傳一百

兆惠

阿里衮

子及外職 烏魯克定

舒赫德

子舒常

兆惠字和甫吳雅氏滿洲正黃旗人孝恭仁皇后族孫父佛標官至都統兆惠以筆帖式直軍機處七遷至刑部侍郎正黃旗滿洲副都統領紅旗護軍統領十三年命兼領戶部侍郎赴金川督糧運疏論糧運事並言請將惟烏爾登哈拏龍勇往並及諸行省遣兵多不實上命告經略傅恒覈實師還命覈軍需調戶部侍郎赴山東按傳鈔尙書孫嘉淦偽疏稿暫署巡撫十八年命赴西藏防準噶爾十九年議用兵命協理北路軍務並督糧運二十年命駐烏里雅蘇臺準噶爾台吉噶勒藏多爾濟降命兆惠畀以牲畜是歲阿睦爾撒納叛陷伊犁命兆惠移駐巴里坤兼督額林哈畢爾噶臺站二十一年師收復伊犁上以定西將軍策楞不勝任召兆惠還京授方略未行命逮策楞並解扎拉豐阿定邊右副將軍以授兆惠時阿睦爾撒納北遁哈薩克定西將軍達爾黨阿逐捕未

得上命還師厄魯特諸宰桑從軍者謀爲亂糾囉斯汗噶勒藏多爾濟告兆惠  
巴雅爾入掠其牧地兆惠令甯夏將軍和起將百人徵厄魯特兵往禦而噶勒  
藏多爾濟從子扎那噶爾布及宰桑呢嗎哈薩克錫喇達什策零等陰通巴雅  
爾中途變作和起死之兆惠自伊犁將五百人逐捕經濟爾哈朗至鄂壘扎拉  
圖與達什策零戰大敗之逐賊戰於庫圖齊再戰於達勒奇殺賊數千二十二  
年正月至烏魯木齊噶勒藏多爾濟扎那噶爾布等諸賊皆會日數十戰馬且  
盡師步行冰雪中至特納格爾遂被圍巴里坤辦事大臣雅爾哈善先遣侍衛  
圖倫楚將兵八百益兆惠軍會兆惠遣軍校雲多克德楞徹自圍中出詣雅爾  
哈善言轉戰狀事聞上嘉兆惠奮勇封一等武毅伯授戶部尙書鑲白旗漢軍  
都統領侍衛內大臣及圖倫楚兵至圍解兆惠得新兵復逐捕巴雅爾至穆壘  
河源巴雅爾已徙牧他處乃還師巴里坤上以兆惠遠道旋師逐賊不怠贊御  
用玉轡荷包鼻煙壺命同定邊將軍成袞扎布分路剪除厄魯特兆惠旋偕參  
贊大臣鄂寶等自額林哈畢爾噶進勦時扎那噶爾布已殺噶勒藏多爾濟會

阿睦爾撒納自哈薩克盜馬竄還伊犁掠扎那噶爾布牧地兆惠察回部頭人  
布拉呢敦霍集占叛有迹令參贊大臣富德遂捕阿睦爾撒納而駐師濟爾哈  
朗以待上責兆惠與成衮扎布急回部綏阿睦爾撒納失輕重兆惠乃率師繼  
富德以北遣使宣諭左右哈薩克師復進次額密勒西岸富德師至塔爾巴哈  
台獲逃渠巴雅爾及其孥檻送京師語詳富德傳哈薩克汗阿布賚使獻馬並  
具表請入覲上降敕宣諭阿布賚使言阿睦爾撒納以二十騎來投約詰朝相  
見令先收其馬並及牛羊阿睦爾撒納驚走獲其從子達什車凌宰桑齊巴罕  
縛送兆惠兆惠以聞命檻車致京師兆惠分遣諸將圖倫楚三達保愛隆阿繫  
敗阿睦爾撒納屈衆降其渠納木奇父子送京師兆惠復進與富德軍合調阿  
睦爾撒納已入俄羅斯上命還師旋授兆惠定邊將軍討布拉呢敦霍集占兆  
惠奏請屯田烏魯木齊以來春進討倘不能卽入回部則且積穀市馬爲持重  
上責其怯懦二十三年正月兆惠以厄魯特人在沙喇伯勒尙萬戶當先剿除  
乃專力回部上授雅爾哈善靖逆將軍趣進師命兆惠剿厄魯特事竟別道合

攻並諭兆惠厄魯特性反覆往往自殘殺母以其烏合稍衆過疑慮兆惠與副將軍車布登扎布等分四道進剿兆惠趨博羅布爾噶蘇車布登扎布趨博羅塔拉副都統瑚爾起等趨尼勒喀侍衛達禮善等趨齊格特皆會於伊犁厄魯特衆紛紜潰竄遂盡殲焉上以賊渠哈薩克錫喇鄂哲特等十餘人皆未獲命兆惠等加意奮勉四月兆惠獲鄂哲特送京師疏言準噶爾事將蒞請自伊犁移師合攻回部上仍責兆惠俘哈薩克錫喇等既又令赴庫車察軍事還京師詔未至而兆惠師已發會雅爾哈善圍庫車霍集占突圍走上逮雅爾哈善以兆惠代將兆惠中途疏言將八百人赴庫車當與雅爾哈善協力剿賊不願覲顏遽還上獎其肫誠勇往賜雙眼孔雀翎既至軍調霍集占自庫車出入葉爾羌城守乃帥師往捕道阿克蘇頭人頗拉特降和闐頭人霍集斯故擒達瓦齊有功至是亦來附並招烏什頭人俱降遂薄葉爾羌兆惠兵止四百自烏什至此千五百里馬行乏糧要隘屯兵霍集占出戰三敗保城不復出兆惠遣副都統愛隆阿以八百人扼喀什噶爾來路阻賊援而率師臨蔥嶺南河爲陳蔥嶺

南河者卽喀喇烏蘇譯言黑水故時謂兆惠軍爲黑水營兆惠念兵寡而城大不任攻謀言賊牧羣在城南英奇盤山乃帥輕騎躡其牧地且致賊爲野戰渡黑水纔四百騎而橋圯霍集占挾數千騎出師戰且戰且涉水土卒殊死戰五晝夜殺賊數千人諸將高天喜鄂寶三格特通額皆戰死兆惠馬再踣而及脛皆傷乃收兵築壘掘濠以爲衛賊亦築壘與我師相持布拉呢敦自喀什噶爾至助霍集占困我師靖逆將軍納穆扎爾等帥師赴援中途遇回兵力戰皆死之上先事發索倫察哈爾健銳營及陝甘綠旗兵濟兆惠師聞兆惠被圍促富德赴援又命阿里袞選戰馬三千送軍前兆惠發阿克蘇令舒赫德駐守至是遣使令以被圍狀入奏上獎兆惠統軍深入忠誠勇敢進封武毅謀勇一等公並賜紅寶石帽頂四團龍補服霍集占旣逼我師爲長圍相持數月賊自上游引水謀灌我師壘我師於下游溝而洩之我師壘迫深林賊發鎗彈著林木中我師伐爲薪得彈用以擊賊常不匱水不給賊引水反得飲又掘井恒得泉發地得藏粟一百六十窖掠野得馬駝千餘迫歲暮圍合已三月軍中糧漸盡上

卒養鞍革甚或掠回民以食布拉呢敦霍集占以圍久不下會布魯特掠英吉沙爾而兆惠卽以是日率師焚賊壘所殺傷過當疑兆惠與布魯特相約因遣使入我師請和兆惠因其使射書諭以納款當入覲二酋亦射書請撤圍相見兆惠置不更答而二酋自此攻稍緩二十四年正月富德帥師至呼爾璦遇回兵轉戰五晝夜阿里袞送馬至合軍復戰布拉呢敦出戰中彈傷還喀什噶爾師至葉爾羌河岸阿里袞與愛隆阿合軍爲右翼富德及舒赫德爲左翼逐賊以次徐進兆惠自圍中望見火光十餘里馬駝羣器塵上知援集乃率餘軍破壘出與諸軍相合引還阿克蘇上爲賦黑水行紀其事兆惠疏辭進封及章服諭母辭並以其母老時遣人存問霍集占之黨攻和闐上以兆惠富德旣合軍急引還謂富德不得以援兆惠爲畢事兆惠爲帥被圍待援尤不當遽引師退諭趣富德援和闐兆惠當就見在兵力加意奮勉以竟全功兆惠督諸將分道進攻布拉呢敦棄喀什噶爾霍集占亦棄葉爾羌同遁兆惠師至喀什噶爾撫定餘衆富德亦收葉爾羌爲畫疆界定貢賦鑄泉幣並分屯滿漢兵駐守富德

師復進追及霍集占戰於阿勒楚爾再戰於伊西洱庫爾淖爾布拉呢敦霍集占竄入巴達克山師從之巴達克山汗素勒坦沙初言霍集占中彈死生獲布拉呢敦復言兩酋已皆死獻霍集占首上加兆惠宗室公品級鞍轡並授其子侍衛兆惠復撫定霍罕額爾德尼伯克所屬四城並齊哩克布魯特額德格納布魯特阿濟畢部衆請留兵分駐葉爾羌喀什噶爾諸城復定各城伯克更番入覲例二十五年二月師還上幸良鄉於城南行郊勞禮兆惠入謁賜朝珠及馬從上還京飲至賚銀幣圖形紫光閣二十六年七月命協辦大學士兼領刑部旋令偕大學士劉統勳按楊橋河決二十七年復偕統勳勘江南運河二十八年直隸水災命勘海口疏天津靜海諸縣水道復命偕兩江總督尹繼善籌濬荆山橋河道二十九年十一月卒上臨其喪贈太保諡文襄嘉慶元年十一月命配享太廟子扎蘭泰尙高宗女和碩和恪公主襲爵授額駙

阿里衮字松崖鈕祜祿氏滿洲正白旗人尹德第四子而訥親弟也乾隆初自二等侍衛授總管內務府大臣遷侍郎歷兵戶二部五年命與僉都御史朱必



增如山東勘巡撫傾色報歉收失實狀疏言蘭山郊城被水最甚請緩徵新舊賦而以官帑市穀補社倉復命與江南河道總督高斌如江西勘巡撫岳瀄等徇情納賄狀鞫實瀄坐黜六年侍郎梁詩正奏八旗兵丁當分置邊屯復命與大學士查郎阿如奉天相度地勢上言地宜耕者吉林烏拉東北拉林阿爾楚克阿爾楚哈東飛克圖齊齊哈爾東南呼蘭西南黑爾蘇站刷煙站白都訥東八家子至登額爾者庫皆沃壤呼蘭東佛忒喜素素富林木惟地高下各異墨爾根寒暑早齊齊哈爾砂磧吉林烏拉無餘地寧古塔山深烏蘇里產蔘皆不宜耕議政王大臣用其議移屯自拉林阿爾楚哈始八年命如湖南勘巡撫許容劾糧道謝濟世狂縱狀白濟世枉命卽署巡撫歷河南山西山東諸省十四年訥親誅令分任訥親償帑旋以兄弟不相及命免之上將巡五台阿里衮疏請於臺懷建行宮太原就巡撫署增建學堂上不許阿里衮別疏薦參將傅謙大學士傅恒弟也上責其不當詔切責十五年授湖廣總督湖北巡撫唐綏祖爲前總督永興劾罷阿里衮白綏祖無受賕狀永興坐黜十六年移兩廣總督

東莞民莫信豐謀爲亂討平之尋居母憂還京師授戶部侍郎擢尙書歷刑工  
戶三部兼鑲白旗漢軍都統二十一年四月命軍機處行走時上方責諸將逐  
捕阿睦爾撒納定西將軍達爾黨阿出西路五月命阿里衮佐達爾黨阿在領  
隊大臣上行走九月師至雅爾拉遇賊再勝十月命與達爾黨阿還京師二十  
二年正月上以成衮扎布爲定邊左副將軍會師巴里坤阿里衮仍在領隊大  
臣上行走二月達爾黨阿以失阿睦爾撒納創爵阿里衮亦坐降戶部侍郎旋  
兼正白旗蒙古副都統時回部大和卓木布拉呢敦小和卓木霍集占分據葉  
爾羌喀什噶爾爲亂於是沙拉斯瑪呼斯諸部游牧與相應九月阿里衮與都  
統滿福自阿斯罕布拉克和什特克取道至哈喇沙爾搜山殺敵復進至塔本  
順和爾納木噶俘男婦二百餘十二月滿福爲郭多克哈什哈誘戕沙拉斯瑪  
呼斯遁庫車諸處阿里衮復進次哈喇沙爾西南庫爾勒二十三年正月復進  
逐敵至呼爾塔克山獲瑪呼斯得木齊額默根等四月阿里衮自魯克察還師  
駐巴里坤上先得伯克素寶瑪奏阿里衮方搜捕瑪哈沁將還師與阿里衮疏

言師向呼爾塔克山不相應上因責阿里衮中途遷延罷侍郎以副都統革職留任六月靖逆將軍雅爾哈善攻庫車霍集占赴援入城守已復走還葉爾羌上爲罷雅爾哈善而督定邊將軍兆惠攻阿克蘇遂進逼葉爾羌十一月命阿里衮選馬三千駝七百益兆惠軍兆惠攻葉爾羌不克瀕黑水結寨霍集占爲長圍困之上聞授富德定邊右將軍阿里衮參贊大臣援兆惠是月命襲封二等公十二月授兵部尙書正紅旗蒙古都統二十四年正月富德師至呼爾璦霍集占出戰五日四夜未決阿里衮以駝馬至乘夜分師爲兩翼斫陳斬千餘級布拉呢敦中創與霍集占並敗走援兆惠全師以還上以阿里衮送馬濟軍如期集事且殺賊多加雲騎尉世職例進一等公七月霍集占走巴達克山部阿里衮與富德等帥師從之降其衆萬二千有奇阿里衮以五百人駐伊西勒庫爾淖爾西截隘復分兵出其南遇敵奪其家屬輜重降二千有奇復將選兵二百踰嶺逐敵克巴達山部旋納欵以霍集占首獻行賞賜阿里衮雙眼孔雀翎二十五年召還京師六月自喀什噶爾行次葉爾羌會雅木扎爾回曾邁喇

木煽訛謂阿睦爾撒納復入阿克蘇羣起爲亂乃復還喀什噶爾率八百人出至伯什克勒木邁喇木等以千餘人拒戰阿里袞督所部擊破之賊入城堅守麾兵合圍夜四鼓城人呼號乞降邁喇木遁去上獎阿里袞應機立辦授其子拜唐阿豐昇額藍翎侍衛阿里袞旋捕邁喇木等送京師復進豐昇額三等侍衛授其次子倭盛額藍翎侍衛十月阿里袞還京師授領侍衛內大臣圖形紫光閣二十八年加太子少保二十九年授戶部尙書協辦大學士時緬甸亂南徵兵連數歲三十一年春將軍明瑞深入上授阿里袞參贊大臣馳傳至軍二月明瑞戰死猛臘大學士傅恒出爲經略授阿里袞及阿桂爲副將軍并令斬領雲貴總督率師駐永昌朝議明年進兵今歲秋夏瘴退先收普洱思茅邊外諸小部落阿里袞疏言邊外十三板納皆內屬不爲亂惟召散整貝猛勇三部附緬甸當用兵時刑部尙書舒赫德在軍與雲南巡撫鄂寧密疏議撫六月緬甸使頭人請款阿里袞拒之以聞上命置毋答並譴舒赫德等七月阿里袞疏請絕緬甸貿易並治雲南省城至永昌道撫慰沿邊諸土司借帑俾市籽種

牛具皆得僉旨十二月阿桂至兵共發兵出邊未深入而還三十四年二月上  
摘雲貴總督明德疏語以軍中馬風責阿里衮等下部議奪職命寬之三月傳  
恒至軍與阿里衮等議進兵渡晏鳩江西攻猛拱猛養兩土司向阿瓦阿瓦緬  
甸都也偏師至猛密夾江而下造舟蠻暮通往來七月師行初阿里衮病瘍上  
遣醫就視良愈至是復大作傳恒令留永昌治疾阿里衮堅請行師進緬甸兵  
不出十月傳恒還師蠻暮復進攻老官屯駐晏鳩江口緬甸兵水陸並至傳恒  
阿桂軍江東阿里衮軍江西迎戰敵結寨自固阿里衮率兵七百攻之敵百餘  
棄寨走把總姚卓殺敵奪其旗師銳進敵四百餘亦遁復戰會日暮敵不能堅  
守皆引去凡破寨三殺敵五百餘傳恒亦避疾諸將議毋更進兵阿里衮曰老  
官屯賊寨前歲額爾登額攻未克距此僅一舍不破之何以報命策馬行傳恒  
以下皆從之寨堅攻不克阿里衮疾甚猶強起督攻視鎗礮最多處輒身當之  
傳恒慮其傷令將舟師毋更與攻寨十二月卒於軍諡襄壯祀賢良祠以豐昇  
額金川功追加封號爲果毅繼勇公子豐昇額倭輿額色克精額布彥達賚豐

昇額自三等侍衛襲封一兵公擢領侍衛內大臣署兵部尙書廂藍旗蒙古都統三十五年八月命在軍機處行走金川再用兵定邊左副將軍溫福爲帥劾參贊大臣伍岱乖謬上命豐昇額往勘因授豐昇額參贊大臣五月豐昇額攻東瑪寨僞退以致敵令章京佛倫泰富爾賽突起僞寨侍衛仲達蘇發鉅礮敵驚卻多墜崖死遂克東瑪六月攻固卜濟山梁師至色爾渠令烏什哈達三泰等左右進攻豐昇額出中路發礮墮礮烏什哈達等引兵出巖下豐昇額自山徑策應鏖戰敵大奔七月復克色爾渠大礮及卡房百餘卡房敵所置堠也旋與溫福大軍合十月克路頂宗喀木色爾諸寨復進克兜烏山梁及附近諸寨十一月克博爾根山奪瑪覺烏大寨再進克明郭宗下礮卡九十餘克嘉巴山焚經樓語詳溫福傳十二月授豐昇額副將軍三十八年正月與將軍溫福副將軍阿桂議分道並進溫福自功噶爾拉進攻噶爾薩爾阿桂自價格宗經納圍納扎木至當噶爾拉待溫福軍至與合攻噶爾拉依豐昇額自章谷吉地經綽斯甲布溫福分道參贊大臣舒常駐軍於此與合攻勒烏圍豐昇額駐軍宜喜

於其地設糧臺規進取四月考績加太子少保溫福師銳進六月次木果木阿  
桂亦克當噶爾拉上令豐昇額攻大板昭命未至木果木師潰溫福死之上聞  
敗命豐昇額引兵自黨壩三雜谷至巴朗拉爲阿桂聲援旣聞阿桂自當噶爾  
拉全師而出屯翁古爾聖諭豐昇額仍駐宜喜爲犄角豐昇額初未移軍分兵  
駐智固山防後路阿桂以定西將軍爲帥十一月收小金川全境豐昇額自宜  
喜攻克沙壩山梁碉卡分敵勢十二月阿桂定策自取谷噶而令豐昇額攻凱  
立葉進兵上命豐昇額以五千人往攻三十九年正月師次薩爾赤鄂羅山占  
其南雪山又分兵屯孟拜拉山梁阿桂遣納木扎等將二千人與合軍二月晦  
夜半豐昇額帥師自達爾扎克北山溯越石踢雪以進次日黎明至凱立葉山  
麓山絕險凡大峰各置碉見我師至且近鎗石並發豐昇額督師直前衝擊與  
侍衛彰鼐明仁取第二峯瑪爾占伊達里取第三峯令領隊大臣五岱營第三  
峯下捷聞上以礮據峯顛仰攻不易克命留五岱於此而移軍谷噶與阿桂合  
軍攻勒烏岡阿桂遣譟告豐昇額達爾扎克面當莫爾敏山山旁地曰迪噶拉

穆扎師得此繞出凱立葉後來攻易爲力豐昇額卽遣兵占莫爾敏山敵力爭  
絕我師前後不相屬卒敗敵取迪噶拉穆扎豐昇額尋從上命移軍谷噶六月  
克色綳普破碉十一七月克該布達什諾大碉十月自問道克墨格爾陟曰爾  
巴當噶西峯破碉寨二百餘得凱立葉山梁之半命議叙賚玄狐帽貂馬褂十  
一月攻格魯古了口通黨壩遂進逼勒烏圍四十年正月克甲爾納堪布卓沿  
河諸碉寨四月破噶爾丹寺及噶朗噶木柵十七五月克了口石碉八木城四  
再進盡墮遜克爾宗諸碉寨敕獎其奮勉命封號加繼勇字七月師至章噶碉  
甚堅碉外爲濠三重濠外立木柵海察攻其中豐昇額督官達色仁和等攻其  
左右毀柵覆濠以度師緣碉側直上自其顛俯攻遂克之並得其旁木城八月  
與阿桂合克勒烏圍九月復進向噶拉依十二月克格隆古科布曲山梁四十  
一年正月克瑪爾古當噶山梁金川全部悉定師圍噶拉依上命加豐昇額一  
等子以其弟布彥達賚襲爵尋移戶部尙書賜雙眼花翎二月金川曾索諾  
木出降致京師四月師還賚御廐馬具鞍轡圖形紫光閣四十二年十月卒贈



太子太保諡誠武布彥達寶自三等侍衛累遷武備院卿嘉慶間授戶部尚書正白旗滿洲都統步軍左翼總兵署統領五年卒贈太子太保諡恭勤布彥達寶女爲宣宗元妃道光元年册諡孝穆皇后禮成追封三等公

舒赫德字伯容舒穆魯氏滿洲正白人徐元夢孫也舒赫德自筆帖式授內閣中書累遷御史充軍機處章京乾隆二年疏言八旗生齒日繁盛京黑龍江寧古塔三省土沃可耕請將閒散移屯並條議設公庫以各省稅務專屬旗員贖旗地典於民者以官地畀無地旗丁以十年爲期次第施行上以稅務專屬旗員爲非是諭曰舒赫德此議但知旗人生計艱難不知國家設關欲稽察姦宄非爲收稅之員身家計也朕日以砥礪廉隅勉臣工尙恐其不能遵奉而可以謀利導之乎況各省稅務本未分滿漢旗員有廉潔者何嘗不可派委大抵爲上者施逮下之仁惟有勵以忠勤示以節儉爲下者皆當早作夜思宣力供職以永受國家惠養方可謂之計長久蓋厚其生計不可不思而長貪以爲惠下則未見其利而且貽害非所以教旗員亦非所以愛旗員也初雍正間京師設

官米局收旗丁餉米存儲平糶舒赫德疏請復設從之五遷至兵部尚書移戶部尚書十三年命從經略大學士傅恒征金川授參贊加太子太保十四年師還留辦軍需奏銷命往雲南湖廣河南查閱營伍並勘雲南金沙江運銅水道舒赫德疏言金沙江下游銅運無阻上游四十餘灘多峻險仍當陸運總督張允隨言上下游皆疏通語不實古州總兵哈尙德因古州被水請移城上令舒赫德相度舒赫德請城內外疏積水無待移建十月復移兵部尚書十五年疏言定例額兵百人闕二謂之名糧爲軍中公使錢惟繕治軍器巡防路費每不給於用馬兵不宜於東南其在西北十居其八亦可量減藤牌兵全無實用擬於馬兵藤牌兵內加增名糧以備公用廷議允行十二月命如浙江勘海塘十六年命勘永定河工又命如浙江按杭州覺羅額爾登受賕狀十七年命偕侍郎玉保赴北路軍防準噶爾十八年以準噶爾內亂撤防召還命如江南塞銅山張家馬路河決時準噶爾達瓦齊復爲台吉所部杜爾伯特台吉車凌等來降準噶爾宰桑瑪木特烏梁海得木齊扎木參瑚圖克等追車凌先後闌入北

路卡倫上命舒赫德如鄂爾坤治軍事而令侍郎玉保前鋒統領努三散秩大臣薩喇爾佐定邊左副將軍成衮扎布十九年春舒赫德至軍參贊大臣達清阿誘致瑪木特將檻送京師疏聞上以瑪木特聞召卽至命釋使還旣薩喇爾努三帥師出邊獲扎木參瑚圖克舒赫德等復疏請檻送京師上以瑪木特誘致扎木參等乃逐捕所得事不同責舒赫德謬誤命以扎木參等囚置軍中軍中方傳達瓦齊遣其將扎努噶爾布以五千人犯邊成衮扎布等致書達瓦齊言瑪木特扎木參等以入邊被捕本末上以爲太懦諭舒赫德等上方以準噶爾內訌將乘時收烏梁海以薩喇爾本蒙古頭人習邊事將倚以招致舒赫德等疏言達瓦齊復爲台吉烏梁海等未易招致令薩喇爾駐軍卓克索待後舉上責舒赫德畏怯使薩喇爾掣肘蒙古貝勒額琳沁公格勒克巴木丕勒以赴軍遷延得罪舒赫德等疏言其至軍後藉勉請贖罪上下詔責其舛謬並及行文達瓦齊事下部議奪官得旨寬免上幸熱河召舒赫德詣行在示方略旋解成衮扎布將軍以授策楞七月輝特台吉阿睦爾撒納來降舒赫德與策楞議

留阿睦爾撒納及諸頭人軍中待命以其帑移置蘇尼特阿睦爾撒納有兄爲瑪木特所獲乞資以行糧俾赴援舒赫德不許是時上方欲倚阿睦爾撒納擒達瓦齊事聞上盛怒詔罪狀策楞舒赫德略謂阿睦爾撒納初來降乃以其眷屬移置戈壁南相距數千里使其父母妻子分析離居失遠人歸附心準噶爾內亂所部叩關內附正可示以懷柔永綏邊境策楞舒赫德顛倒舛謬至於此極皆奪職以閒散在參贊大臣上效力贖罪並籍其家罪及諸子二十二年正月上命阿睦爾撒納佐班第帥師討達瓦齊阿睦爾撒納請移游牧於烏里雅蘇臺上許之命領隊大臣兆惠駐軍於此予舒赫德章京銜佐兆惠六月師已定伊犁諭曰策楞舒赫德軍前効力今大功已成本欲施恩開其自効策楞已予都統銜駐軍巴里坤檢舒赫德筆札雖無怨望語乃效漢人習日必記事作詩嗣宜痛自改悔令仍以章京留烏里雅蘇臺上分準噶爾故地本衆建諸侯意四衛拉特各爲汗阿睦爾撒納求爲總統上不許遂叛其妻子在烏里雅蘇臺舒赫德偕兆惠收送京師二十一年喀爾喀台吉青滾雜卜叛驛道中梗會

察哈爾兵數百送羊至舒赫德留之分布諸台站軍報乃通行邊至努兌木倫  
護厄魯特人掠馬者烏梁海人入邊竄匿俄羅斯馳檄往案上嘉其治事尙協  
機宜召還授正黃旗漢軍副都統二十二年正月上命成衮扎布爲定邊將軍  
逐捕阿睦爾撒納授舒赫德參贊大臣尋擢兵部尙書兼鑲黃旗漢軍都統三  
月以舒赫德在軍獨具疏奏事責其放縱罷尙書七月疏請防範沙喇斯遊牧  
內移上斥其藉作歸計嚴諭申戒十二月上以成衮扎布師久無功詔罪狀舒  
赫德略言舒赫德起自廢籍初赴軍授方略令傳諭成衮扎布並戒其毋更怯  
怯乃至軍後諸事皆失機宜卽如招服克特烏魯特等遊牧當收其馬以佐  
軍乃任令屯駐山中致兵過復叛及朕有旨詰責始東遮西露往來道途疲馬  
力於無用之地舉此一端可見諸事皆無成算此實舒赫德未將朕旨宣示成  
衮扎布之所致也舒赫德罪不勝誅朕念成衮扎布去年擒青滾雜卜之功實  
舒赫德以不死令奪職爲兵從軍贖罪二十三年予頭等侍衛銜駐阿克蘇十  
月將軍兆惠逐捕霍集占深入被圍命定邊右副將軍富德往援授舒赫德參

賀大臣會於巴爾楚克舒赫德以阿克蘇通葉爾羌喀什噶爾要隘當設卡倫上嘉之擢吏部侍郎遷工部尚書鑲紅旗滿洲都統賜孔雀翎十二月簡阿克蘇銳卒諸路兵先至者馳援兆惠二十四年正月與富德合軍解兆惠圍子雲騎尉世職七月命移駐葉爾羌旋命仍駐阿克蘇先後奏定回城賦稅台站酌設伯克阿克蘇鑄腰格以四存公六畀回人阿克蘇庫車哈喇沙爾烏什和闐置文武吏皆得旨議行尋以回部平圖形紫光閣二十八年加太子太保二十九年命如福建按提督黃仕簡劾廈門洋行陋規總督楊廷璋以下皆得罪語詳廷璋傳三十一年署陝甘總督旋署戶部尚書三十二年如湖南北讞獄三十三年將軍明瑞征緬甸敗績死之上命大學士傅恒爲經略授舒赫德參贊大臣先赴雲南籌畫進軍舒赫德密疏議巡忤上旨下部議奪官並削雲騎尉世職命以都統銜參贊大臣出駐烏什三十六年土爾扈特汗渥巴錫等自俄羅斯來歸衆疑其僞降舒赫德力白無他志命如伊犁宣撫尋授伊犁將軍十一月授戶部尚書三十八年加太子太保授武英殿大學士九月命如江南監

黃河老壩口隄工繇張民王倫叛破臨清命督師進剿克之倫自燔死賜雙眼孔雀翎復予雲騎尉世職賚貂冠黑狐褂四十一年金川平圖形紫光閣初舒赫德爲伊犁將軍子舒甯在京杖斃二奴得罪上命發伊犁交舒赫德約束及是又以爭煤礦爲山東民所訟舒赫德縛舒甯送刑部疏請罪下部議奪官命寬之四十二年四月卒贈太保諡文襄祀賢良祠子舒常始爲侍衛舒赫德議移置阿睦爾撒納妻子得罪舒常亦奪官發黑龍江披甲及舒赫德召還爲副都統授舒常三等侍衛舒赫德以佐成衮扎布無功再得罪舒常復發黑龍江乾隆二十三年二月命釋還累遷至鑲藍旗護軍統領三十七年將軍溫福征金川授參贊大臣金川平圖形紫光閣與舒赫德父子並列前五十功臣舒赫德卒令還京治喪授工部侍郎出爲貴州巡撫遷湖廣兩廣總督入爲工部尙書復出署江西巡撫復爲湖廣總督荊州漢水決奪官授一等待衛擢都察院左都御史改鑲黃旗蒙古都統嘉慶初署刑兵二部尙書卒諡恪靖

論曰兆惠再就圍中受降得援師克竟其功而爲之援者前則雅爾哈善後則

富德順坐法不克有終訥親之誅也高宗謂策楞達爾黨阿皆愧稱阿里衮獨  
內疑遇事畏忌然策楞達爾黨阿先後僨事奪封阿里衮以戰閔承世祚豐昇  
頌繼之慶延於後嗣舒赫德初爲御史有直聲後出視軍高宗屢言其懦再被  
譴謫終致台司功名始終之際蓋亦有天焉然其要必歸於忠謹茲非彰彰可  
觀者歟